



C40  
4514  
165



C40-4514



B 64863

了翁上座詩大藏及百  
家書置武州華雲山  
我微矣塔院直符中永  
為學者不敢計出院內  
當山二世鐵牛禪譯

大乘集菩薩學論卷第十一

第十二 同卷

法

稱

菩

薩

造

卷之三藏朝散大夫試鴻臚少卿宣梵大師曰稱筆奉詔譯

清淨品第八之二

論曰復次應知說悔過行如金光明經偈云

十方住世

兩足之尊

以悲愍心

當證知我

若我先造

廣大罪業

住十方前

皆悉懺悔

未識佛時

未識父母

我造此罪

自恃種族

及恃財寶

盛年傲逸

我造此罪	心念口言	造衆惡業
謂不可見	我造此罪	愚夫惡行
煩惱覆心	由無智暗	近惡知識
遊戲樂著	或住憂恚	財無厭足
我造此罪	貧窮詐詐	由生怪嫉
不親聖人	我造此罪	因欲生怖
於去住時	不得自在	我造此罪
因欲恚怒	動擾其心	飲渴所逼
我造此罪	飲食衣服	由斯三種
諸結熱惱	我造此罪	身語意業
我悉懺悔	我悉懺悔	
不生恭敬	又若緣覺	及菩薩衆
諸說法師	我悉懺悔	不起尊重
由謗正法	不起承迎	或於有德
我悉懺悔	我悉懺悔	我悉懺悔
十方三世佛	觀察護念我	心運無緣悲
哀受我懺悔	我於百劫中	先若造諸罪
常懷憂怖心	哀愍願消除	又心常怯弱

怖此諸過咎 於四威儀中 曾無飲樂想  
諸佛具大悲 除諸世間怖 今當願攝受  
解脫諸怖畏 我先造諸罪 對如來發露  
以佛大悲水 洗滌煩惱垢 又若此罪惡  
一切皆懺悔 若已作之罪 皆不敢覆藏  
若未作之業 一切不復造 謂身業三種  
及語四過愆 與意業三毒 一切皆懺悔  
論曰菩薩所得罪犯約勝說有輕重故優波離所問  
經云於根本罪等比而說何者復重佛言優波離住  
大乘菩薩如犯毘伽沙數貪罪與一瞋罪於菩薩乘  
爲作校量此二罪中瞋唯屬重所以者何優波離起  
瞋者捨離衆生然起貪者愛護衆生優波離若愛護  
衆生則不爲煩惱於菩薩所無有災橫等怖乃至是  
故優波離若有犯貪罪者皆名無罪是義云何愛護  
衆生者如前增勝故我說深心有是悲愍佛言優波  
離菩薩若無方便善巧則畏犯貪罪若菩薩有是方  
便善巧者則怖犯瞋罪而不怖犯彼貪愛何以故方  
便善巧者具悲智二種而不捨離衆生若捨衆生者  
唯一智惠悟解苦空或唯悲愍非久如間爲煩惱力  
之所滅滅如方便善巧經云善男子譬如持明之人

爲彼羈索五處繫縛以真言王於所求法卽能超越由一真言明力悉能斷除一切縛法善男子是菩薩方便善巧受五欲樂亦復如是然於所作不亂正行謂若以一智力偏一切智心淨諸欲樂當生梵世論曰瞋義云何謂本性爲大罪故由廣分別不生方便悲愍行恚怒者然非利益何名過失以容受彼則長養煩惱減失悲愍斯爲過失斷此根者後當可見若菩薩如於衆生失悲愍心則於衆生廣大利益相續減失故聖諦品云應知如父見子起悲愍心謂若弃他世間利樂悲愍則亦當遠諸有智又若菩薩勸

行於欲減失利益是故說貪過各得二種難彼著欲者譬無知人違害父母於下劣欲而生苦惱損減失趣又著欲者毀犯禁戒遠離人境是故希求已樂厭捨他苦非真實見應以他苦惱如已苦惱然不自修習起二種失如月燈經說佛告阿難假使有人從足至頂洞然熾燄成一火聚復有人來語如是言我勸汝身共受五欲歌舞嬉戲佛告阿難於意云何是人勸就此身可共五欲歌舞嬉戲不阿難白言不也世尊佛告阿難是人於歌舞嬉戲由分別橫起勸就此身共受五欲歌舞嬉戲如來不爾往昔修菩提行時

見諸衆生三惡道苦及貧窮者心無悅樂論曰世間有子不見父母懷耽痛苦有此大恩唯見

已樂或親非親愍惜覆藏守護善法幢者勿行邪欲此於衆生或爲利益或復損害謂若縛纏嘴彼欲者爲過咎具正梵行作利益故若比丘入是行處應如母妹而供侍之不應於他如梵行類成就衆生固當遠離如無盡意經云於時非時復捨其所作或見衆生增上利益亦住是學處又方便善巧經云昔光明梵志於四萬二千歲中嚴持梵行住七步已發生悲愍設犯禁戒受地獄苦不應棄彼令趣命終善男

子是光明梵志卽時執彼右手作如是言姊起如其所欲以要言之善男子如是深妙欲中起大悲心於十千劫受輪迴苦後復還修梵行善男子以菩薩方便善巧得生梵世彼經又說若有菩薩爲一衆生發善根者於其色相如罪所墮百千劫中受地獄苦之所燒煮世尊彼菩薩然起是罪無地獄苦謂由於一衆生亦不捨離此善根故彼經又云善男子此方便善巧菩薩有極重罪謂或時遇惡知識勸就此蘊取證涅槃然於後際不復堪任被斯鎧甲何容化度一切衆生故我不起是心如彼輪轉化度衆生又若設

有是罪如其法行使無過咎善男子若出家菩薩一切分別所造過四重罪是菩薩具方便善巧者隨起卽悔說爲無罪如寶雲經所明造極無間者謂令人死聲聞律中名根本罪處又若剝剝鹿屬如起悲愍說爲無罪此貪得者若菩薩起貪猶生善趣則不應瞋怒如說方便善巧菩薩樂作貪暗於妙女色極樂修作數數願求生女人中厭彼貪心捨女身已得丈夫相成大身者佛告阿難汝見如是功德不自餘衆生雖行如是起猛利貪然猶出離苦器生人天趣乃至藥王大士云何菩薩起瞋謂若發生煩惱何容施諸妙樂等

論曰若爲此名聞如是於餘衆生利益方便設起貪者說爲無罪此方便善巧菩薩所造利益而不棄捨衆生廣如彼說然非得地六度妙行於此伺察極善相應是故不容瞋等又優波離所問經云佛言舍利子菩薩有二大罪何等爲二謂心與瞋俱及與癡俱乃至舍利子應先志誠懺十惡罪及五種愆亦當懺悔謂手執眼觀心難制止或於一衆生兼餘二種舍利子復說有重五無間罪謂具作此菩薩或時於他婦女染行非法手斷命根盜佛塔物四方僧物菩薩

爾時如犯彼罪應向三十五如來前於晝夜中一餓  
悔云我某甲歸依佛歸依法歸依僧

那謨釋迦牟尼佛 那謨金剛消伏壞散佛  
那謨寶談佛 那謨龍自在王佛

那謨勇猛軍佛 那謨勤勇喜佛  
那謨寶火佛 那謨寶月光佛

那謨不空見佛 那謨寶月佛  
那謨離垢佛 那謨勇施佛

那謨梵德佛 那謨栴檀吉祥佛  
那謨水王佛 那謨水天佛

那謨賢吉祥佛 那謨栴檀吉祥佛  
那謨無邊威德佛 那謨光吉祥佛

那謨無憂吉祥佛 那謨那羅延佛

那謨蓮華光遊戲神通佛 那謨淨照明遊戲神通佛

那謨財吉祥佛 那謨念吉祥佛

那謨善名稱吉祥佛 那謨因陀羅網幢王佛

那謨善遊步吉祥佛 那謨安祥行佛

那謨勝遊步佛 那謨普偏光嚴吉祥佛  
那謨寶蓮華勝遊步佛

那謨寶蓮華善住娑羅樹王佛

如是現前乃至一切世界如來應供正等正覺惟佛世尊觀察護念我於今生或至餘生及無始來生死輪轉造業障罪自作教他見作隨喜或盜宰堵波物四方僧物五無間業十不善業道自作教他見作隨喜由斯業障毀除禁戒應墮地獄或旁生趣談摩境界若生邊地及蔑戾車生長壽天設得爲人諸根不具深著邪見離佛出世此諸業障佛以真實慧真實眼真實證明真實稱量悉知悉見今悉懺悔不敢覆藏若我毀犯禁戒等罪願佛世尊觀察哀愍若我今生或至餘生及無始來生死輪轉乃至於旁生趣或嘗施一搏食護一淨戒若修梵行所有善根化度衆生發菩提心及無上智一切善根如稱量已無不回向最上最勝阿耨多羅三藐三菩提果我今亦如過去未來現在諸佛之所回向乃至偈云

懺除一切罪

諸福皆隨喜

及勸請諸佛

演說無上道

過去及未來

現住人中尊

無邊功德海

一切歸命禮

舍利子是菩薩於三十五如來前如是作已是諸如來隨知作意得罪清淨由罪清淨故此諸佛世尊當

現其前如是解脫利益衆生現諸相好由是愚夫異生於此化度輒生疑惑乃至一切聲聞及緣覺衆而不能使彼惡作罪處清淨地若有菩薩於此諸佛如來名號而常持念晝夜三時轉正法行出離彼罪得三摩地說此是名悔過及對治行

論曰讀誦甚深經典得彼罪滅如能斷金剛般若波羅密多經云復次須菩提若善男子善女人受持讀誦此經若爲人輕賤所以者何是人先世所造罪業應墮惡道由見是法以今世人輕賤故先世罪業則爲消滅得佛菩提等

論曰信解空性得罪惡清淨故如來藏經云佛言迦葉波有十不善業道是爲大罪此最極殺生者謂若殺父斷緣覺命最極不與取者謂若欺奪三寶財物最極欲邪行者謂起汚母及無學尼最極妄語者謂言我是如來最極兩舌者謂於聖衆作離間語最極惡口者謂訶毀聖賢最極綺語者謂巧構浮飾亂諸法欲最極貪者於正道財利起侵奪心最極瞋者於五無間無悲愍心最極邪見者謂橫起僻執深險惡見迦葉波若一衆生具足如是十不善業道大罪者如來以是因緣宣說法要爲令悟入無我無人無衆

生無命者無作無受是行是造作是幻化然諸法性  
卽煩惱性入解諸法自體明亮信解諸法種種清淨  
我不說有衆生墮惡趣者又淨諸業障經云復次文  
殊師利若菩薩觀非律是律則見罪非罪觀輪迴界  
卽涅槃界則見諸煩惱是爲緣生當知是人得業障  
清淨又底哩三昧耶王經說對治行云若閉目觀緣  
諸佛菩薩誦百字明八千遍已開眼備覩佛菩薩等  
得離彼罪或右繞佛塔誦八千遍塔像經典隨一現  
前如儀廣說又尊那陀羅尼經云若念誦已乃至夢  
見是相得滅彼罪若夢天女授乳酪飯得離彼罪或  
見日月昇虛空中猛火水牛及黑丈夫怖走而去又  
若夢見比丘比丘尼衆或乳木樹白象白牛山峰船  
舫處大殿堂及師子座聽聞妙法應知悉是罪滅之  
相又如來形像品說對治行云譬若有人不淨塗身  
臭惡可厭以水洗灌施妙塗香而彼臭惡卽時遠離  
如是造作五無間罪具足偏行十不善業道若得信  
解如來造佛形像得離彼罪由無罪故智慧殊勝具  
菩提心由殊勝故而或出家堅持淨戒花積陀羅尼  
經云爾時師子遊戲如來當住於世經百千歲施諸  
妙樂時彼如來般涅槃後起舍利塔若人以菩提心

持彼一花供養如來合掌稱名或灑水爲淨及一花  
鬢塗香花燈乃至身行一步超諸言說稱南無佛於  
彼師子遊戲如人勿應疑惑若於一劫百劫千劫返  
墮惡道者則無有是處又藥師瑠璃光王經云若持  
五戒十戒菩薩四重戒出家比丘二百五十戒比丘  
尼五百戒如於所受或有毀犯怖墮惡道若人專念  
藥師瑠璃光王如來名號如其供養是人決定不墮  
惡趣爾時世尊告阿難言若我稱讚彼佛世尊藥師  
瑠璃光王如來所有功德是爲諸佛甚深境界汝無  
疑惑生實信不爾時具壽阿難陀白佛言世尊我於  
如來所說經中不生疑惑所以者何一切如來身語  
意中所集善行無不清淨世尊此日月輪最爲高遠  
具大威光可使墜地妙高山王亦可傾動是諸佛言  
終無異也世尊然有衆生信根不具聞說諸佛甚深  
境界便發是言由何唯念一如來名便獲爾所功德  
勝利由斯不信便生誹謗於長夜中退失利樂佛告  
阿難若聞彼佛名墮惡趣者無有是處阿難此是諸  
佛甚深境界難可信解阿難汝信解者應知皆是如  
來威神之所建立非諸聲聞緣覺未登地者唯除一  
生所繫菩薩摩訶薩故彼經又云若餘淨信善男子

論

大乘集菩薩學論卷第十一

二

北  
總

善女人鄒波索迦鄒波斯迦具足八分齋戒一年三年受是學處以此善根願生西方極樂世界無量壽如來前者若得聞是藥師瑠璃光王如來名號是人臨命終時八大菩薩皆以神通來示正道復有種種問色世所希有衆寶蓮華自然化生或復生於天上如是生處而宿植善根彼無窮盡亦復無有墮惡道怖彼天歿已復生人世爲轉輪王統四大洲

大乘集菩薩學論卷第十一

轉六

大乘集菩薩學論卷第十二

轉六

法稱造

宋西天三藏朝散大夫試鴻臚少卿宣梵大師曰稱等奉詔譯

清淨品第八之三

與無量百千萬俱胝衆住十善業道後復生彼刹帝利婆羅門長者大種族中財物豐饒庫藏盈溢色相眷屬皆悉具足彼經又云若有女人得聞是藥師瑠璃光王如來名號受持者後轉女身又文殊莊嚴佛刹功德經云妙吉祥言我亦恭敬是慧上菩薩光幢菩薩如意願菩薩寂根菩薩若有女人持是四菩薩

名號者得轉女身後不復受

論曰對治行略如前說制止力今當說如地藏經云  
若菩薩摩訶薩離殺生者卽是施與一切衆生無憂  
無怖及無悲惱驚懼毛豎以斯善根果報所有前際  
乘五趣輪溺生死海因是殺生造身語意一切業障  
自作教他及隨喜作由此遠離殺生輪故一切摧滅  
乃至不受其報於現身中得壽長遠諸天及人之所  
所愛樂復次善男子若菩薩摩訶薩乃至盡形壽雖  
不與取卽是施與一切衆生無憂無怖及無熱惱不  
生動亂於自財利而行喜足終不希取非法之利以

斯善根乃至因是遠離不與取故一切業障摧滅無  
餘不受其報以要言之如是十不善業道亦能對壞  
自所修善如月燈經云聞瞋滅罪者如說凡愚不實  
瞋罵誹謗者安住忍伏盡諸往昔所造罪業及於菩  
薩所起瞋等

論曰制止力已如前說依止力今當說故諸緣起中  
釋云若能歸依佛者不墮惡道捨此人身得生天趣  
若法若僧亦同上說又慈氏解脫經說菩薩淨諸罪  
業者諸不善法若遍大地而劫火起時一切所有無  
不燒者乃至譬若有人以喝吒迦汁一兩點千兩鐵

而作黃金非彼多鐵能令少汁而返成鐵此發一切智心亦復如是以一善根回向智能攝受一切業煩惱障成一切法智非諸業煩惱障能令一切智心而爲煩惱善男子又若有人持以一燈入黑暗室卽時能破千年復古之暗此發一切智心亦復如是如入一衆生心無明暗室俱能破壞百千不可說劫復古業煩惱障發智光明善男子如大龍王首戴如意摩尼寶王冠無他冤敵等怖比菩提心亦復如是若菩薩具大悲心無有惡道冤敵等怖優波離所問經云此住大乘菩薩摩訶薩於初日分時有毀犯罪當中

日分時不捨行一切智心如是菩薩得戒蘊具足若中日分時有毀犯罪當後日分時不捨行一切智心則菩薩戒蘊亦復具足我應復說如是次第佛言優波離此住大乘菩薩或時捨戒學處然於彼菩薩勿起惡作亦勿隨轉若復於彼聲聞乘者展轉說爲有毀犯罪然聲聞人謂失戒蘊應如是知乃至廣說

### 忍辱品第九

論曰此不遠離有多門轉而善守護令戒長養如是離業障縛破煩惱結乃至聞忍不忍減失精進怠墮俱故或復不聞不知等待方便由無方便淨諸煩惱

是故解退唯聞修習了雜亂行謂誦習勤苦依止山林彼修行者暫息雜亂而心無等持然此止息亦等持攝尚無少果況餘淨諸煩惱設修此觀亦亡少善乃至說淨諸煩惱法集經云此說忍有三種謂安住苦忍諦察法忍耐冤害忍安住苦忍者得究竟行對治苦怖及得除遣著樂之受餘二種惱彼云何說謂瞋恚懈怠等月燈經云著樂之者亦不捨苦又寶雲經說若內懷憂悲苦惱者住方便調伏忍最上授所問經云復次長者在家菩薩應當遠離不如理損害勿著世間八法所得妻孥及諸受用財穀豐饒不以

高舉逸豫設諸衰弊亦不低下愁惱應如是觀察諸有爲相幻化所造起高舉處息滅罪報謂此父母妻子奴婢僕從親眷朋屬等彼旣非我我亦非彼如有偈云若有所幹集由何起愁惱或無所幹集亦何起愁惱爲所幹集者以癡恚悶絕疲懈故或執著勇悍起大過咎疑惑追悔須臾夭壽應遠離此無益是難

論曰云何捨是愁惱謂發輕輒心者如最上問經云於此遠離則令心柔軟如覩羅綿又華嚴經云應如勝財王童女發如是心滅諸煩惱以無能勝心破諸

瞋忿以不動心於衆生海而不退墮深心境界論曰修習此者不以爲難如其所有愚者尚爾至若檐夫耕農畋獵剋苦修習荷負鄙事惱微細果塵穢不淨心無悔惱況復此等諸妙樂行諸菩薩樂爲最勝事趣無上果又如諸鄙賤者少不饒益於身難作尚無廢壞但自繫念剛強領納如決勝負況復此等長時無益受諸苦惱由何於善法財少不憚取地獄治罰世間賊害獄卒守護按治無遺隨處遇會極爲痛惱使勿爲免於久遠時無諸繫縛捍勞忍苦破煩惱賊淨盡無餘於三有中被勝甲冑執持器仗敗諸魔冤解衆生縛由先修習以少剋苦而得成就於諸衆生修苦樂想謂諸苦生時如其處所修習樂想住樂想者卽能成辦此果得三摩地名超諸法樂如父子集會經云佛言有三摩地名超諸法樂若菩薩得是三摩地者於諸事緣受如是樂受不苦不樂非一因緣如其處所而得樂想譬若有人以因緣故斷截手足及耳鼻等耳鼻斷已如其處所而得樂想及以鞭杖之所打朴翻如樂想或爲牢獄繫閉捶撻謂作衣者然酥燈者然油燈者祇蔗漿等者如其處所而住樂想作鴉鶠面者作師子面者燃曝曉者乃至造

金錢者造飲食者供象酒等者翻如樂想或爲挑目  
破壞命根諸有損害及墮首等翻如樂想無苦樂想  
所以者何此菩薩摩訶薩如是願力長夜修作若我  
爲諸走使得近妙樂若我爲罪犯者亦以承事尊重  
恭敬供養一切時處得近妙樂若遇惡言譏刺打扑  
刀仗割截乃至諸壞命根一切所有得菩提樂成證  
阿耨多羅三藐三菩提果具足如是作意如是事業  
如是願力亦復具足一切衆生隨知樂想親近修習  
於彼業報多所修作而得超諸法樂三摩地若時菩  
薩得至一切法樂三摩地者是故得大不動壞諸魔  
事由是方便圓滿一切捨施成就一切難行苦行堅  
牢一切忍辱策勵一切精進助修一切禪定智慧是  
故常喜如月燈經說常喜尊重常住正見又無盡意  
經云何等爲喜謂喜念法清淨信樂發踊躍心不生  
懈怠無諸熱惱不求五欲之樂不離一切法樂由心  
建立身喜覺喜起適悅意樂如來身莊嚴相好希求  
善巧聽法無厭依實法行由法生喜愛樂淨信然於  
衆生覺了無礙以最勝欲勤求佛法不捨法欲廣大  
信解諸佛妙法示解脫乘發最上心除慳惨心若初  
發心施當施施已三輪清淨歡喜布施於妙尸羅亦

常清淨由持淨戒攝諸毀禁而常超越諸惡道怖向  
佛禁戒堅固無毀正使他人惡來罵辱於語言道心  
不加報樂然故忍變以尊重逮無憍慢貌常溫恭遠  
離顰蹙先以愛語無諂無伎淨意不邪心不麤澀見  
諸勝已亦無曲抑不覬乖謬不揚他失修和敬法於  
菩薩眾敬如佛使敬諸佛法惜過身命於諸師長如  
己父母護諸衆生猶如一子於和尚阿闍黎敬如佛  
想於諸正行皆如上首諸波羅密如愛手足於說法  
師如諸妙寶諸教令中如親五欲於喜足行如無病  
惱求勝妙法如希妙藥於發露者如遇良醫如是調

御諸根使無懈怠說此是名爲喜

論曰此言學菩薩莊嚴者如大雲經說若樂地獄旁  
生者於地獄趣心常戒定雖處獄城而得如旅泊又  
樂地獄者於地獄趣心生愛著及與慳嫉令地獄火

轉復熾盛

論曰說安住苦忍者故海意經云有三種忍佛言海  
意此菩薩摩訶薩如其所發一切智心寶中或爲非  
人毀犯淨戒謂若諸魔魔民及天魔后魔力所持令  
魔使者固來侵害震擊動搖期尅打擲當於是時此  
大菩提發深固心令無所壞亦復不壞大悲精進解

脫一切衆生亦復不壞令三寶種紹隆不斷亦復不壞諸佛法中於此相應積集善本亦復不壞成辦相好修習福行亦復不壞勇力精進嚴淨佛土亦復不壞求一切法不惜身命亦復不壞度諸衆生不著已樂是中深心具如是意若爲一切衆生之所惡賤或遇瞋恚譏毀罵辱及諸打擲悉能忍受至若一切衆生以惡心來逼惱摧壓亦悉堪任不疲不懈不退不沒勇猛精進勢力發現捍勞忍苦起攝受心又若有人以惡心來若瞋若罵若害逼惱忿恚打擲於如是心悉不加報乃至設復有人於十方界執諸器仗逼逐其後彼地方所若行若住若坐若卧是中若遇一人發菩提心修布施心乃至修智慧心者聞彼發起一善根心我當卽至彼地方所正使斷割其身節節支解如棗葉量於是等事我悉堪忍又若世間一切衆生皆起瞋恚巧出惡言罵辱譏毀加以斷割其身節節支解如棗葉量我當是時於此衆生終不爲起少分動擾之心所以者何然我此身於過去際無量無數生死輪轉靡所不造或處地獄畜生琰魔羅界乃至今在人趣耽味飲食諸欲受用聽受非法艱苦追求邪命資養多種逼迫然於身命曾無果利雖復

種種多所營作緣此不能自利利他設復生死最後邊際使諸衆生於我身分斷割支解寧受衆苦我終不捨一切智心亦復不捨一切衆生及善法欲所以者何然我此身多種逼惱苦切殘毀比地獄苦百分千分乃至優波尼刹曇分不及其一又復於佛法中不捨大悲所緣一切衆生以要言之若有因緣起瞋恚者我當以法斷除云何爲法所謂愛樂於身繫屬於身取著於身捨是身者卽捨瞋恚佛言海意於如是法聚而趣入者卽能堪任一切衆生之所逼惱乃至不惜其身而能棄捨亦不愛樂者此卽能修布施波羅蜜多復次若遇身欲壞時大慈不捨一切衆生此卽能修持戒波羅蜜多若遇身欲壞時如義解脫堪任忍受忍力發現亦不動擾其心此卽能修忍辱波羅蜜多以勤勇力不捨攝受一切智心於生死中發諸善行此卽能修精進波羅蜜多復次若身壞時於心發現一切智寶不捨菩提如實觀察勝寂寂靜此卽能修靜慮波羅蜜多若遇身欲壞時觀身幻法猶如草木牆壁瓦礫入解於身是無常是苦是無我是寂滅如是諦察其身此卽能修勝慧波羅蜜多乃至設復有人以惡心來瞋恚罵辱卽作是念是人解

急遠離白法我今發起精進勤求修習植諸善本勿生厭足乃願是人先坐道場我當最後取成正覺以要言之是等衆生名未調伏者未寂靜者未密護者未近寂者爲作義利莊嚴鎧甲乃至我依此法云何是瞋云何非瞋二中伺察俱不可得又若是瞋非瞋若自若他瞋與瞋者皆不可得斯不可得尚離此見是卽名忍又般若云若諸衆生有所諍競者及所諍事然我於諸衆生爲作橋梁我若爲他惡罵毀訾汝何此語不應加報但類癡人及若啞羊不起鬪諍他或惡來醜言罵辱於語言道心無損害親近於他我應善語不似於彼起斯過咎乃至若我聞他過失亦不似彼所以者何我意無怒故又若一切衆生所須妙樂者我當與彼衆生妙樂乃至涅槃成證阿耨多羅三藐三菩提然我於他終不起瞋及與自他起愚癡行唯修堅固精進以精進故設壞身命而無恚惱不生顰蹙又菩薩別解脫經云若於恚怒衆生如是安慰極善安慰住此忍者得隨順法喜

音釋

大乘集菩薩學論卷第十二

詞

卷第十三

北轉

羈網也 古法切 嘴常利 切 好也  
也 貂翻正 切 捶候肝 切 剝剥北角 切割也  
貞遠也 暴許戒 切 瞠暴也 切 力  
制切 勵楚革 切 策勵進也

勉也 觀物廉 切

闕也

轉六

大乘集菩薩學論卷第十三第十四 同卷 転七

法稱菩薩造

卷之三藏朝散大夫試鴻臚少卿宣燒大師日稱等奉詔

精進波羅密多品第十

論曰雖聞住如是忍發生精進然於此未聞尚起毀犯如月燈經偈云

倣法不護戒爲得幾多福破戒縱多聞

無能免惡道

論曰由聞具勝能者那羅延所問經云善男子如所聞解得勝慧性若聞息除煩惱令煩惱魔皆不得便

是中廣如最上大仙本起經云菩薩摩訶薩具足深心尊重法欲住餘世界現諸佛前隨所聞法若菩薩摩訶薩精進法欲於山林中貯法伏藏得無量經典法門如置掌中又諸菩薩精進法欲而得佛現前及諸天等與佛辯才乃至命欲將盡爲佛世尊及諸天等增益壽命及與色力住命千歲非本所求爲佛諸天共加持故乃至求住一切又諸菩薩生法尊重爲佛世尊除老病苦得授正念及通達辯才乃至得授正見隨見能說又若菩薩摩訶薩精進法欲無他一切冤敵等怖是故精進多聞資糧善巧菩薩修習得

如是等

論曰菩薩聞幾種行入解毗奈耶如無盡意經云由聞八十種行而能入解所謂欲行深心行深固心行極相應行無倨傲行不放逸行恭敬行極尊重行離名相行善言行承事行聞利益行作意行不散亂行無住行寶想行藥想行消除一切疾病行念器行達解行意喜行悟入行聽聞佛法無厭行廣捨行了知調伏行親近多聞行喜樂感受所作行身踊躍行心悅樂行聞不懈退行聞義行聞法行聞威儀行聞他說行聞所未聞妙法行聞神通行不樂餘乘行聞諸

波羅密多行聞菩薩藏行聞攝事行聞方便善巧行  
聞梵行行聞正念正知行聞已生善巧行聞未生善  
巧行觀不淨行觀慈行觀緣生行觀無常行觀苦行  
觀無我行觀寂滅行觀空無相無願行無作行善作  
行建立真實行無減失行單已行守護自心行精進  
不懈行諦察諸法行對治煩惱行希求自分善法行  
降伏他分煩惱行依止七財行斷諸貪窮行讚諸有  
智行欣樂智者行衆聖平等行非聖淨信行見諦行  
遠離諸蘊過失行稱量有爲過失行依義行依法行  
一切惡作行利益自他行於善修作不發餘業行趣  
向殊勝行所得一切佛法行彼經又云若於助法相  
應則得如是智業云何助法相應謂若少務少求慎  
語慎行初夜後夜聞諸世間順理相應者稱量利他  
數數推求心無濁染除諸益障於餘罪犯以智出離  
不起惡作發起趣向堅固正行樂法敬法爲法與府  
具足精進如救頭然希求智慧爲遊止處不墮禁戒  
不捨重負趣發殊勝捨無益衆樂單已行於阿蘭若  
現前作意及聖種子杜多功德喜足不亂欣樂法樂  
不念世間語言求出世法要及無妄念通達義利隨  
順真道知持戒緣慙愧莊嚴以堅實智破壞無智以

勝慧眼極妙清淨覺了無明癡暗繫縛謂廣大覺了無邪曲覺了分別覺了現證覺了不從他得持自功德讚他功德善所修作不墮業報是爲智業清淨又般若中說應何所聞於方廣經論當如是學非義利者亦應遠離所謂世間處論鞭朴論蠱毒論默置論童子戲劇論乃至所有別部解脫等論成就癡冥善住一切菩薩乘者悉應遠離又如無盡意經云有四種施於說法師爲智資糧而得成就何等爲四一者謂紙筆墨經二者嚴飭法座三者具諸名聞利養四者爲攝受法不以詭詐稱讚復有四護何等爲四一者謂護己身二者護善三者護諸世間四者護利益事乃至復有四住爲智資糧而得成就何等爲四一者住說法師二者住法三者住利養四者住覺悟是名四種又華樓閣經云若人以須彌量七寶聚布施在家菩薩者不如能以千錢奉施出家菩薩或以信解出家功德施一指節修難行施若諸所有唯除出家得是大果如來最上最聖非在家者有如是理況復在家無智心不具足如最上問經云謂若一心於他眷屬等罪而能遠離說爲無罪彼若不能遠離性難調故於在家者建立是罪

說阿蘭若品第十一之一

如最上授所問經說依止住阿蘭若次第居家者性  
過失故又如月燈經偈云

不起著欲

遠離眷屬

棄捨在家

得無上道

若離於欲

如避火坑

怖畏在家

遠離眷屬

無上菩提

斯不難得

未有三世

諸佛如來

由常在家

住於欲地

而能獲得

勝妙菩提

捐捨王位

如弃欵氽

父住空閑

遠離諸欲

斷除煩惱

降伏魔冤

離垢無爲

悟菩提道

飲食衣服

妙花塗香

而得承事

人中聖尊

如出家已

奉行正法

若有如是

求菩提者

善利衆生

厭有爲事

趣向空閑

至行七步

所獲福報

最勝無比

若復值遇

非衆同分

樂處衆會

怖財利者

衆生隨行

離彼方所

是愚闍難

彼經又云

猛利應當捨

離此極惡心

勿競愚者法 智不近於愚 了知愚本性  
能使久相親 後當成怨嫉 智不保於愚  
了知愚本性 謂體性癡冥 自當求破壞  
由是諸異生 何有善知識 若法共言說  
不順瞋過咎 斯愚法礪毒 故智者不保  
愚與愚者合 如糞投不淨 智復與智俱  
如酥置酥內

彼經又云

常於世間 最極樂處 無有少分

若樂不樂 唯於所有 一切都無

沙門勝樂 若於所有 隨得受用

無有纖毫 所繫屬者 如風轉空

如獨覺行 乃至世間 諸最樂事

心常如風 無所繫着 不樂不樂

不有合集 謂此苦惱 不樂安住

謂若樂彼 無苦無違 離二邊故

唯此法樂 非人中樂

彼經又云

彼得當時 微作相應 離別衆矣

不諍少分 彼相應理 住阿蘭若

獲是功德 而常獲得 不憚有爲  
不樂世間 不增有漏 住山林者 常樂近寂  
獲是勝能 不起過分 住空閑者 及遠離行  
身語意密 得彼厭離 速悟解脫  
獲多功德 住山林者 卽住解脫  
寂靜解脫 諸阿蘭若 覺是功德 棲止林泉  
諸阿蘭若 而常遠離 城邑聚落 樂遠離已  
而常遠離 常如獨覺 無有伴侶 非久如閒  
常如獨覺 得斯勝定 無量過咎 亦常不愛  
棄捨在家 無有男女 得樂山林 諸根妙樂  
深險思慮 無有男女 如獨覺行 獻笑言論  
寂靜功德 設有人來 心淨無垢 處處少欲  
設有人來 不喜財利 意不耽著 謂求恭敬  
當遠離此 最上問經云我應不作衆生合集非爲於一衆生而  
起善根或先所聞具刹那頃繫著財利心不淨者若  
天若人咸悉捨去設一天人亦復捨去又如寶樓閣

又護國經所說偈云

棄捨在家 無量過咎 亦常不愛  
深險思慮 得樂山林 諸根妙樂  
寂靜功德 無有男女 如獨覺行 獻笑言論  
設有人來 心淨無垢 處處少欲  
不喜財利 意不耽著 謂求恭敬  
當遠離此

經云佛言迦葉波譬若有人泛大水中爲渴而死迦葉波此沙門婆羅門亦復如是然於多法受持讀誦而不能斷貪嗔癡渴遊大法海爲諸煩惱渴愛而死後墮惡道

論曰是故決定依阿蘭若及相似處又寶雲經說若住所依之處得行乞食不近不遠流泉浴池清淨無垢少怖畏處樹葉花果皆悉具足遠離險惡多者龕窟寂靜第一菩薩如是當依此處應先晝夜六時自誦經典聲不高下善閉諸根心不外馳於此淨命繫念所受善取其相不著睡眠若王王臣刹利婆羅門及餘官屬或親來詣阿蘭若處彼比丘應作是言善來大王如所施設可就此座王若坐時比丘亦坐王若不坐比丘亦立王若諸根動亂應當讚言大王得大善利王之境土有諸具戒具德多聞沙門婆羅門安住其中不爲惡人冤賊憚害王若諸根善淨堪爲說法卽當爲說善巧之法審若不樂善巧則當爲說厭離之法審若不樂厭離則當令知如來有大慈悲具大威德爲諸來者刹利婆羅門及餘官屬隨其所宜爲作化度彼若多聞堪任法器者使聞妙法降伏其心彼等衆生信樂是法得大歡喜最上授所問經

云復次長者出家菩薩住阿蘭若應如是觀察是義  
云何我住阿蘭若中非獨沙門相者而多猛惡懶悞  
非察非靜非律儀非相應非願求之所共住彼不具足沙  
門功德爾時我住阿蘭若處我應圓滿是沙門義乃  
至復次長者出家菩薩阿蘭若行應如是觀察我以  
何義至阿蘭若我當爲此怖畏云何怖畏謂處衆憤  
鬪怖合集怖貪瞋癡怖嬌慢覆很怖慳嫉財利怖色  
香味觸怖蘊魔怖煩惱魔怖死魔怖天魔怖無常計  
常顛倒怖無我爲我顛倒怖不淨爲淨顛倒怖執苦  
爲樂顛倒怖心意識怖離障起障怖身見怖我我所  
怖疑三世怖惡友怖惡屬怖名聞利養怖不見言見  
怖不聞言聞怖不覺言覺怖不知言知怖沙門垢穢  
怖互相嗔忿怖三界怖諸有趣生怖三惡道怖總略  
一切不善作意怖我爲如是此恐怖畏行相詣阿蘭  
若住乃至復次長者出家菩薩住阿蘭若當如是學  
若怖生時一切皆由我執所起以要言之復次住阿  
蘭若遠離我執則無我無我所無我相無我愛無我  
想無我見不爲我所持不爲我所計捨離於我不爲  
守護住阿蘭若此非利益復次長者住空閑者無已

想無他想若於諸法無說則於諸法無雜以要言之長者譬如阿蘭若處藥草樹林不驚不怖不畏亦無驚懾毛堅此出家菩薩住阿蘭若行亦復如是於身發起藥草樹林牆壁瓦礫之想心如幻化所生何有分別及有怖畏驚懾毛堅如是深心於身觀察是身無有我人衆生壽者養者意生儒童虛妄遍計此怖畏者但有假名虛妄遍計不應分別如彼阿蘭若處藥草樹林無有主宰亦無攝屬此阿蘭若無有攝屬亦復如是於一切法如是知已應起是行所以者何住空閑者猶若強屍無有主宰亦無攝屬乃至復次長者出家菩薩如住空閑於此知已依佛所說住阿蘭若卽得圓滿白法深植善根然後出諸聚落國邑入於王宮而爲說法復次長者出家菩薩讀誦演說其義趣入彼衆中而得恭敬親近和尚阿闍黎及耆舊中而新學比丘亦應尊敬亦無懈怠悉自營辦無令他惱亦應勿使尊重承事當如是觀察又如來應等正覺爲諸天人魔梵沙門婆羅門及諸衆生尊重供養乃至諸有所作悉自營辦不怖承事況復我今欲求無學如是承事一切衆生若我承事於他一切供給則我諸有所作悉自成辦不復怖求承事供

給所以者何長者此尊重承事者於比丘功德法中攝取毀犯造此攝取者因得承事故我勿由是法造此攝取彼經又說復次長者彼阿蘭若菩薩法若見若聞和尚阿闍黎疾病者雖處迦野應往問訊謂若旦時詣彼應發是心設復爲他所請讀誦解說令住僧坊者如阿蘭若心勿愛著如是住阿蘭若求法無厭於一切事皆空閑想

大乘集菩薩學論卷第十三

轉七

大乘集菩薩學論卷第十四

法 菩 薩 造

卷十四  
藏朝散大夫試禮少卿寔大師日稱等奉譯

說阿蘭若品第十一之二

寶積經云復次阿蘭若行若諸異生未得果者見虎狼至勿生驚怖當發是心我本詣此阿蘭若處已捨身命不應驚畏爲起慈心遠離過失使無怖懼又若虎狼斷我命根噉我身肉應起是心我得善利以不堅身而當獲堅固若復不能令噉我肉豈彼虎狼得樂觸耶以要言之復次阿蘭若行有非人來若美若

醜不應愛樂亦勿損害若有往昔見佛諸天來此阿蘭若比丘所起諸問難時彼比丘如力所能隨所學法爲諸天說又若有深問難時阿蘭若比丘或未能答而不生恭敬者應語彼言我今未得無學若我當勤佛教時聞法已盡能通解答一切問我今唯能得是法乃至總略若住阿蘭若處藥草樹林尚不取著云何爲生何等爲滅如是觀察是身無我無主宰無作者無受者誰生誰滅畢竟無有生滅之者是身亦復如是譬若草木牆壁瓦礫無我無主宰無作者無受者因緣和合故卽生因緣離散故卽滅復次於

勝義中無有一法是生是滅彼經又說復次阿蘭若行應發是心然我至此阿蘭若處獨無伴侶若我所起善作惡作爾時此有天龍藥叉佛世尊等知我深心俱爲我證又若住此阿蘭若中以心不善自在遊逸又若至此極遠之處獨無伴侶無親近者無我無取應如實覺欲尋恚尋害尋及餘不善法尋悉如實覺若我於此不異其衆樂處有情憤鬧中者卽爲欺誑天龍藥叉諸佛世尊若如所作天龍藥叉不爲詞厭諸佛世尊悉皆歡喜

治心品第十二之一

禪定波羅蜜多附

論曰於此阿蘭若修是禪定如般若經云修此禪定波羅密多者得心不散亂利諸衆生所以者何起世間定彼尚亦然乃至心散亂者皆不可得況復阿耨多羅三藐三菩提是故得心不散亂乃至成證阿耨多羅三藐三菩提果彼經又說復次須菩提初發心菩薩摩訶薩修禪定波羅密多行時於一切相智相應作意則善入禪定若眼見色不取其相亦不執取隨形妙好若於眼根不修制止則依邪妄損惱於餘惡不善心隨其流轉護眼根者制此令盡如是耳所聞聲鼻所艱香舌所了味身所著觸意所知法皆不取相亦不執取隨形妙好若於意根不修制止則於餘惡不善非法之心隨其流轉護意根者制此令盡則行住坐卧語默時處悉不捨離三摩呪多得彼手足不生動搖口無雜言亦無戲笑諸根不亂若身若心俱無妄失三業寂靜於顯密中如律儀道乃至喜足易養易滿善入行處遠離憒鬧於得不得無有高下等無差別如是苦樂毀譽若讚不讚若天若壽亦無高下等無差別若寃若親心常湛然是聖非聖其聲無雜於樂不樂猶如一相無高無下等無差別超諸違順所以者何於自相空如不真實則見諸法無

生無滅乃至廣說

論曰喜樂修習者遠諸懈退而常作意者息除高舉  
於此二種是所對治護國經偈云

無量俱胝劫

所有佛出世

由是大懲尊

剎那獲勝益

遠離於放逸

解脫諸染欲

此有爲虛妄

如幻夢所見

乖離非久住

諸愛亦不常

如奮力營求

諸波羅蜜地

乃至悟菩提

精進無疑惑

大戲樂經廣說偈云

老病死苦

如火燄然

三有熾盛

無適無莫

未離輪轉

常處愚昧

譬若狂蜂

處罥器內

三界無常

如戲劇者

及秋空雲。

旋生旋滅

人命遷壞

過於山水

輕捷迅速

如雷飛空

虛天界城

遍三惡道

無明橫起

愛有所生

隨轉五趣

如陶家輪

常樂美色

及妙音響

清淨香味

細滑觸樂

貪著此者

如被囚縛

如鹿寄網

如猴被縛

害懷怖懼

作冤家想

此欲樂者

極多憂惱

如鋒銳刀

亦如毒藥

智者遠離

如棄糞餅

愚懵念著

爲怖畏因

及爲苦本

愛有所纏

疾起衰老

常樂欲者

怖無歸抹

如大淤泥

如持蜜刀

如避空劔

又諸智者

了知此欲

如糞穢餅

如毒蛇首

如木耦驢

如塗人血

如死狗頭

如惡冤家

又諸聖智

如鏡中像

如戲劇人

如夢所見

又此欲樂

智者了悟

如幻如餸

虛妄不實

但謂盛年

遍計所起

意樂此者

實愚夫行

及老病至

壞苦所吞

退失光澤

如竭河流

財力豐饒

庫藏盈積

愛樂此者

實愚夫行

或至匱財

後疾耗滅

遠離於人

如空園林

譬如花果樹

愛樂人憚取

貪寢衰老時

厭棄如鴟鴞 豐財壯色者

樂生利悅心

貧窶衰老時 厥棄如死屍

又此衰老相

年邁極過朽 譬如雷電火

焚餘枯槁樹

此衰老可畏 亦猶朽故宅

是故牟尼尊

說速求出離 又若婆羅林

爲藤蔓所縛

如男女眷屬 枯乾速衰朽

又若溺泥夫

頓乏於勇健 此老相亦然

趨捷無快利

老變形容醜 威雄勢力衰

固非安隱樂

趣死無光澤 此百種病惱

說速求出離

是世間苦惱 俱捨妙樂尋

及至死滅時

又如霜與雪 奪草木滋茂

追求極邊際

壞命根色力 倉庫多崇積

痛苦於世間

常如疾病人 好起瞋恚事

及冤害讐對

炎熱如空日 及至死滅時

財命俱散壞

譬川流不返 如果葉墮樹

亦如河中梗

漂沉不自在 隨業果難停

獨去無伴侶

此死滅之法 又若磨竭魚

吞噉無量衆

如金翅食龍 及獸王搏象

若猛火焰然

焚燒諸草木

反覆

又敎示勝軍大王經說佛言大王譬若四方有四山來堅固精實周普連帯狀一合成無有缺漏亦無間隙是中空界地際一切動植悉歸磨滅誰有踊躋而可逃避及以勢力呪禁藥術財物等事而令退轉佛言大王世有四種大怖畏事亦復如是誰有踊躋而可逃避及以勢力呪禁藥術財物等事而能退轉何等爲四謂衰老病死佛言大王一者衰勢來時摧逼興盛二者老相現時摧逼少壯三者病苦集時摧逼調適四者死滅侵時摧逼壽命此復云何佛言大王亦如師子爲衆獸王色相勇健皆悉具足爪牙剛利入鹿羣中搏取其鹿隨應所欲然鹿踊躋入猛獸口無能爲也佛言大王死箭射人亦復如是縱使剛強無能逃越無歸無救亦無投寄節節支解血肉枯竭飢渴熱惱張口大息手足紛亂於追求事悉無堪能涎涕流溢便利不淨塗汚支體餘命漸滅中有現前隨業緣起焰魔使者甚可怖畏趣黑夜分於出入息最後而盡唯已獨行更無伴侶奄背此生倏往佗世奔大險道入大黑暗涉大曠野趣大稠林泛大溟海業風飄墮所向冥冥曾無標記餘無歸棲餘無投寄佛言大王唯法與法是歸是棲是所投寄佛言大王

此善法者如寒者得火如熱者遇涼渴者飲清冷水  
飢者食珍美饌疾病者遇良醫藥怖畏者得強力伴  
是爲歸抹佛言大王此諸善法有大勢力亦復如是  
無歸抹者爲作歸抹無投竄者爲作投竄大王是故  
應知有現無常者現滅盡者法爾如是唯死怖畏佛  
言大王王恃所爲悉非善法所以者何大王然此身  
者從昔已來縱加守護及加瑩飾上妙飲膳恣情飽  
滿及命終時未免飢渴逼惱而死如是身者雖以種  
種可愛奇文侈服上妙細疊行住坐臥隨意嚴飾及  
命終時穢惡不淨要當流出大王又此身者雖以澡  
沐塗香株香熏香妙花無量嚴飾及命終時不久臭  
穢又此身者后妃嬪女眷屬圍繞種種妓樂歌舞嬉  
戲及諸僮僕悅意快然及命終時未免怖畏及諸苦  
惱佛言大王至若此身雖處宮殿臺榭樓閣戶牖軒  
檻彩繪嚴飾種種花香及與燈明屏幛幃幔牀座裯  
褥燒衆名香散諸妙花寶瓶香鑪處處行列及妙珠  
寶錦綺雜飾玩好之具及命終時至塚墓間骨肉毛  
髮膿血臭穢屍卧地上都不覺知佛言大王又此身  
者而常乘御象馬車乘擊鼓吹貝作大音樂張妙憶  
蓋執持扇拂無量勇健象兵馬兵車步兵導從前

後百千官屬城邑人民又手恭敬不以要當屍卧車上衆人荷挽出大城門父母妻妾兄弟姊妹奴婢僕從作業使人心纏憂惱頭髮被亂舉手拍頭悲咽哀慟咸歎苦哉於我無株無親無主城邑人民銜悲瞻戀至塚壙間或復爲諸鳥鳶鵠鷲狐狼野干之所食噉乃至餘骨積薪所焚或瘞於地風雨曝露未爲微塵散擲餘方佛言大王此身幻化終歸壞滅一切諸行悉是無常乃至廣說

論曰此貪瞋癡等一聚煩惱至若對治修習因是遠離故寶雲經說對治貪者於起貪緣悉能遠離云何修不淨觀云何名不淨觀謂若於身髮毛爪齒皮膚血肉筋脉骨髓肪膏腦膜汗淚涕唾咽喉心肺肝膽脾腎生臓熟臓尿尿濃汁菩薩於如是物而起觀察則愚癡小兒顛狂不善知是物已猶尚不起貪愛之心況諸智者是爲菩薩修不淨觀又如般若經法後次善現菩薩訶薩修般若波羅蜜多行時然於此身如實了知善現譬如解牛之師及師弟子斷牛命已復用利刀析爲四分若坐若立如實觀察善現菩薩訶薩修般若波羅蜜多行時亦復如是然於此

身地界水界火界風界如實觀察乃至善現又若耕夫或諸長者滿治場中有種種穀所謂菽麥稻粱脂麻芥子等有明目人分別視之如實了知彼種種穀此是菽麥此是稻粱此是脂麻芥子等善現菩薩摩訶薩修般若波羅蜜多行時亦復如是然於此身從頂至足髮毛爪齒種種不淨之所充滿而菩薩如實觀察是身唯有髮毛爪齒頭目脂髓肝膽脾腎生臘熟臘眵眸不淨等乃至若詣塚間觀種種相謂所棄屍於塚墳間或經一日二日乃至五日身體脹青瘀臭惡皮穿肉潰膿血交流見是事已我與此身亦復如是然此身者法爾如是本性如是如是法性曾未解脫復次善現菩薩摩訶薩修般若波羅蜜多行時而於外身修隨所觀乃至觀所棄屍於塚墳間或經一日二日乃至七日爲諸鳥獸鳥鳶鷲鷺狐狼野干之所食噉及餘種種蠅蟻噃食見是事已我與此身亦復如是然此身者法爾如是本性如是如是法性曾未解脫以要言之又若觀所棄屍於塚墳間蛆蟲噃食不淨臭穢我與此身亦復如是餘如上說乃至復次向悽慘道觀所棄屍肉銷骨現筋纏血污我與此身亦復如是餘如上說復次向悽慘道觀所棄

屍血肉都盡身骨相現餘筋尚纏我與此身亦復如是餘如前說復次向悽慘道觀所棄屍唯有衆骨散擲異方所謂頭骨足骨腰骨背骨頸骨臂骨等我與此身亦復如是餘如前說乃至復次善現菩薩摩訶薩修般若波羅蜜多行時向悽慘道觀所棄屍唯有骨在風飄雨漬白若珂貝我與此身亦復如是餘如上說復次善現菩薩摩訶薩修般若波羅蜜多行時向悽慘道觀所棄屍唯有骨在經歷多年變異青色如泥處地碎末爲塵我與此身亦復如是然此身者法爾如是本性如是如是法性會無解脫

論曰以不淨觀對治貪者則修慈觀對治瞋恚此乃平等若不樂觀衆生者此或於一飲食發生愛樂則於他妙樂希求稱讚無不愛樂慈者度貪欲因緣不著染愛是義有三種無盡意經云謂初發心菩薩修衆生緣慈已習行菩薩修法緣慈得無生法忍菩薩修無緣慈

## 大乘集菩薩學論卷第十四

音釋

朴 普木切 小擊也 懷惄 懵惄力董切 偒 勻於耕切 當 勻也 蜜其俱切 鶴余搏 補各切 標甲遙切 樹辭夜切 壞鳥名 擊也 標表也 日樹

於計農各次切多赤脂晦乃預切耳垢也潰瘍也

卷之三

普樂愛最養育二軒無盡意密云罷心碧雲  
休歇快樂無不繫繩無不受樂慈普濟食船因緣不  
平等苦不樂贊衆生普此知尔一僧食船坐樂頭  
福曰以不倒贊誰欲食普順斜膝蹲坐卽悲此

法稱菩薩造

宋西天三藏朝散大夫試鴻臚少卿宣梵大師日稱等奉詔譯

**治心品第十二之二**

亦名禪定波羅蜜多品

復有佛緣菩薩緣聲聞獨覺緣衆生緣等彼衆生緣者謂先樂與利益安樂以禪定意與彼慈故或有知識客寄近住以已聚落如他聚落乃至於此一方解脫如是汝緣十方佛等亦無厭怠如金剛幢回向中說具足修習菩薩行者若所見色對治於愛如是乃至聲香味觸法對治於愛則無罪犯是淨是善最上

光潔超諸妙樂生適悅意起淨信樂發生踊躍安住  
極喜於分別心不生退惱心意調柔諸根猛利常受  
妙樂如是回向一切諸佛轉復回向諸佛般若而得  
具足不可思議佛妙樂行然未同佛得善攝受三摩  
地樂由是力能展轉得佛無量妙樂具足無量佛解  
脫樂攝受無量佛神通樂得善攝受無數諸佛無著  
行樂得佛自在如彼牛王所至遠近速疾妙樂畢竟  
獲得無量佛力了知一切寂靜無生無滅等樂於無  
著行而常等引得諸如來不二集行無瞋妙樂是爲  
菩薩常以如是善根回向如來回向菩薩者謂於意  
樂未圓滿者回向圓滿於一切智未清淨者深心清  
淨一切波羅蜜多未成辦者爲令成辦發菩提心猶  
若金剛令一切智鎧無有退屈若令一切智鎧無退  
屈者則於菩提妙樂隨所輕安於諸善道無所退向  
平等安住一切世間圓滿大願修習一切菩薩之行  
了知菩薩利根神通由斯善根證一切智以如是善  
根義故回向菩薩又若學佛教者一切聲聞辟支佛  
等亦以善根如是回向若有衆生一彈指頃聞佛法  
聲及賢聖衆爲作尊重以此善根回向阿耨多羅三  
藐三菩提所謂念佛圓滿回向念法方便回向尊重

聖衆回向不離見佛回向清淨心回向通達佛法回向所修無量功德回向清淨一切神通善根回向斷諸法疑回向是爲於聲聞辟支佛等學佛教者之所回向又彼菩薩亦以善根回向一切衆生所謂遠離地獄道回向斷除畜生道回向與琰摩羅界妙樂回向斷除墮諸惡趣回向令彼衆生樂欲增長無上菩提回向爲令深心得一切智心回向不謗一切佛法回向畢竟成就一切智地回向畢竟清淨一切衆生回向以無量智回向一切衆生乃至所有飲食衣服卧具病緣醫藥於身承事去來坐立種種作業住律儀道於律儀道不生瞋恚身語意業如善修作密緻諸根而或自身消息按摩等事衆味飲食若開若合若觀不觀若卧若覺而復自身詣彼承事菩薩於一切智緣平等相應者無不回向彼一切智心樂利樂一切衆生乃至意常救護一切世間發起善根遠離憍逸以要言之令諸煩惱不復現前爲諸菩薩之所守護決定勤求一切智道愛樂親近諸有智者乃至而能修習一切善根速得圓滿相續諸行以要言之彼畜生趣者或以少飯而能施與令彼一切得生善趣如是利益解脫回向彼畜生者是爲苦海是苦所

取是爲苦蘊是名苦受是爲苦聚是苦遷流是苦邊  
際是苦根本是苦依處於彼衆生不退回向又彼一  
切衆生緣者謂於衆生現前作意由先所作善根發  
菩提心回向一切智故不墮輪迴離諸險難得佛妙  
樂現前無礙超輪迴海永斷相續照明佛法起大慈  
故如最勝金光明經慈悲藏伽陀云

是金光明

最勝金鼓

所出妙聲

遍三千界

能息地獄

及餚摩羅

乃至人中

貧窮苦等

又此金鼓

滅除世間

一切障惱

亦願衆生

得除恐怖

如牟尼尊

寂靜無畏

如諸聖人

處生死海

修一切智

如彼所得

勝慧等持

及菩提分

功德大海

又此鼓音

願諸衆生

獲斯梵響

如佛證已

勝妙菩提

轉淨法輪

住無數劫

說法利生

滅貪瞋癡

煩惱衆苦

若有衆生

住於惡道

爲火所燒

身常洞然

聞斯鼓音

如教誨言

令歸佛寶

又令衆生

得宿住念

於百千億

俱胝生中

念牟尼尊

聞甚深教

又此鼓音

常得近佛

淨修善行

遠離罪惡

乃至偈云

又諸刹土

一切衆生

息除世間

所有諸苦

又若衆生

身分下劣

根缺減若

普得諸根

悉皆圓滿

若疾病者

身形怯弱

隨其方處

無所依怙

解脫衆病

得獲輕安

根力充實

又若衆生

王法所加

生種種怖

及多憂惱

彼諸衆生

苦難若至

最極惡事

百種怖畏

悉令解脫

或復捶打

枷鎖繫縛

種種諸苦

逼切其身

又復無量

百千種類

憂畏愁歎

間擾其心

牢獄繫閉

打撻楚毒

一切解脫

被臨刑者

遽活軀命

衆苦雖至

得無怖懼

又若衆生

飢渴逼惱

令得上味

美膳飲食

盲者備覩

衆妙色相

聲者得聞

適意音響

彼裸形者

得細軟衣

貧窶衆生

得衆伏藏

倉庫豐饒

衆寶嚴飾

一切衆生

獲斯妙樂

無一衆生

受諸苦報

諸相端嚴

人所樂見

飲膳豐饒

福德具足

常得受用

無量妙樂

箜篌簫笛

衆妙音聲

隨彼心念

應時現前

念水卽現

清淨池沼

金色蓮華

及優鉢羅

遍覆其上

隨彼心念

應時現前

乃至偈云

塗香花鬘

和合末香

每日三時

供養十方

不可思議

一切如來

菩提妙法

諸大菩薩

遠塵離垢

諸聲聞衆

得離一切

甲下種族

及八難處

常值無難

最勝中王

常得親近

諸佛如來

乃至偈云

願諸女人

得爲男子

剛健勇猛

智慧聰利

而常修行

諸菩薩道

六波羅蜜

見十方佛

在寶樹下

處琉璃座

安隱快樂

圍繞恭敬

聞說妙法

南

論曰此略明慈行對治於瞋以緣生觀對治於癡今當說是中緣生義者稻稈經說云何內緣生法繫屬於因謂無明緣行乃至生緣老死若無無明則知無有行乃至若無有生則知無有老死又若實無明滅則行滅如是乃至生滅則老死滅又彼無明不念我從行起行亦不念我從無明得起如是乃至生亦不忘我從老死得起老死亦不念我從生得起若實無明起者則行起不可得如是乃至生起則老死起亦不可得應知是爲內緣生法繫屬於因復何內緣生於緣云何地界謂令此身聚集而轉堅硬爲性說爲地界又若令身攝持造作說爲水界又若令身煖性現前飲食成熟說爲火界又若於身造出入息說爲交蘆令五識身相應繫屬有漏意識說爲識界若非此緣者則身不轉若內不闕地界如是水火風空識界亦無闕減彼彼和合則身定轉故然此地界不念我能令身堅聚水界不念我能令身攝持造作火界不念我能令身溫煖飲食成熟風界不念我能於身作出入息空界不念我能於身中成竅隙識界不念

我爲緣生由是緣故身定得轉又此地界無我無人無衆生無壽者無意生無儒童非男非女亦非非男亦非非女無自在無主宰無此無彼及無所有如是水火風空識界亦復無我無人無衆生無壽者無意生無儒童非男非女亦非非男亦非非女無自在無主宰無此無彼及無所有復次無明者是義云何謂於此六界之中起一想合想堅固想常樂我淨想衆生壽者意生儒童想自在主宰等想如是種種無智說爲無明由此無明謂實有境起貪瞋癡卽彼貪瞋癡境此說爲行於事表了此說爲識識俱生時彼四

取蘊說爲名色又此名色所依諸根說爲六處三法和合此說爲觸由觸領納此說爲受受耽著故此說名愛愛深廣故說名爲取取能生有有復生因由是蘊起名生蘊熟爲老蘊滅名死癡暝染着畏死名憂追感傷歎名悲五識相應不常領納名苦作意和合極苦名惱如是引生隨煩惱等乃至總略

### 大乘集菩薩學論卷第十五

大乘集菩薩學論卷第十六

法稱菩薩造

卷第十二

治心品第十二之三

復次所說真實行及邪妄行謂無智無明由是無明起三種行謂福非福不動行等此說是爲無明緣行又此福行非福行不動行等隨所得識之所招集此說是爲行緣識今詳此處合有識緣名色一段經文梵本元闕如是名色及名色增長於六處門造作所起此說是爲名色緣六處又此六處六觸身轉此說是爲六處緣觸若觸生

時令受所起此說是爲觸緣受若受美味深喜樂著此說是爲受緣愛喜耽味故若處樂色色離散時數追求而不棄捨此說是爲愛緣取如是追求令後有起身語意業此說是爲取緣有若業遷謝令蘊生起此說是爲有緣生又若生已變異令熟及壞滅時此說是爲生緣老死乃至是中由識等自體爲種子業自體爲良田無明愛等自體爲煩惱以業煩惱等令識種生者謂此業爲識種田事愛爲識種沃潤無明爲識種開發然業不念我爲識種田事愛亦不念我爲識種沃潤無明不念我爲識種開發是識種子亦復不念我爲衆緣所生然識種子住於業地以愛沃潤無明滋長生名色芽此名色芽非自作非他作非二俱作非自在天所化不由時變非一因生非無因生無不繫於父母因緣和合耽染相續是識種子於母腹中生名色芽然此法爾無有主宰無我無取等如虛空體相幻化因緣不闕由五種緣發生眼識何等爲五謂眼識生時藉眼及色空緣明緣作意緣等是中眼識眼爲所依色爲所緣明爲照矚空作無礙同時作意爲彼警發闕是緣者眼識不生謂若不闕內眼根處如是不闕色及空明作意緣等故彼一

切和合則能生眼識而眼不念我與眼色爲作所依  
色亦不念我與眼識爲作所緣空亦不念我與眼識  
爲作無礙明亦不念我與眼識爲作照矚作意不念  
我與眼識而爲警發如是眼識不念我從緣生然眼  
識生時實藉衆緣和合而生如其次第諸根生識隨  
應爲說然無有法從於此世得至佗世但由業果因  
緣不闕之所建立譬如無薪火則不生是業煩惱所  
生識種亦復如是彼彼生處相續和合生名色芽如  
是法爾無有主宰無我無取如虛空等體相幻化因  
緣不闕應知內緣生法有其五種何等爲五所謂不  
常不斷無所至向因少果多相似相續云何不常謂  
若此邊蘊死彼邊蘊生非卽死邊蘊是彼生邊蘊是  
曰不常又不滅於死邊蘊而起於生邊蘊亦非不滅  
於死邊蘊然起於生邊蘊譬若權衡低昂時等是曰  
不斷又於異類衆生身處非衆同分生邊蘊起是曰  
無所至向又今少作善惡業因於未來世多獲果報  
是曰少果多又若此生作業則未來受報是曰相  
似如續佛言舍利子此緣生者以如實正惠常修無  
我無入衆生壽者如不顛倒則不生不滅無作無爲  
無對無礙無怖無奪無勤無懈觀彼自性無有堅實

如病如癱如痛如害是苦空無常無我等性彼復隨觀前際不流轉者謂我於過去世會有耶誰謂我於過去世會有耶我於過去世爲無耶誰謂我於過去世爲無耶復於後際不流轉者我當未來世爲有耶誰謂我當未來世爲有耶我當未來世爲無耶誰謂我當未來世爲無耶復於現在世不流轉者我於今有耶誰謂我今有耶云何爲我今有耶又十地經說是中無明愛取是爲煩惱流轉不斷行有是爲業流轉不斷餘支是爲苦流轉不斷復說無明緣行是曰前際觀待識及受等是曰現在觀待愛及有等是曰後際觀待此上所說皆名流轉乃至如是由繫屬故則爲流轉若離繫屬則無流轉由和合故則爲流轉若離和合則無流轉由是了知諸有爲中多種過失是故我今當斷繫屬及彼和合然爲化度一切衆生畢竟不斷諸有爲行

念處品第十三之一

論曰彼治心業略明緣生對治於癡次當入解不淨身念處今當說如法集經云復次善男子菩薩如是住身念處者謂我此身從足足指跟踝脣脛膝髀腨臂脣脊腹肋胸脇手指肘腕肩臂頸項頭頰髑髏等

狀衆分積聚是卽業有由斯造作種種煩惱及隨煩惱百千種類邪正分別是身唯有髮毛爪齒血肉皮骨肝膽脾腎心肺腸胃生藏熟藏肪膏腦膜眵淚涎涕便利不淨多物積聚以何爲身由是觀察身如虛空則見一切諸法皆空爲空念處了知是身由二種念所謂流散及不流散是身來者不從前際去者不至後際亦不住二際中間唯從顛倒和合造作由斯領受是中居處而爲根本然實無有主宰亦無攝屬但從客塵先所作事身體形貌受用依止爲所持處然此身者唯有父母赤白和合不淨臭穢攬爲自體三毒憂惱常爲賊害是散壞法種種百千病惱窟宅如寶髻經說是身無常而不久住死爲後際了知此已不應於身而生邪命應當以身修三種淨施何等爲三謂身淨施壽命淨施受用淨施是身無常應當往詣一切衆生所親近承事欲何所作或如僕使或如弟子離諸諭誑身過失等是身無常唯出入息爲壽命因寧造罪惡是身無常應於愛樂受用不生耽著一切當捨復次善男子菩薩以身觀身念處應觀自身及一切衆生身等同佛身威神加持得離縳縛然觀自身及一切衆生身與如來身無漏法性彼相

無異故應如是知又無畏授所問經說謂我此身非先所集漸次散壞譬若微塵九竅流溢如瘡疤門又諸毛孔有囉羅弭迦猶如毒蛇依止而住身如聚沫體性怯弱如水上泡暫生卽滅亦如陽燄本無有體身如芭蕉中無有實身如幻事爲他教勑身如惡友多諸諍訟是身如猴性唯輕躁是身如讎常伺其短是身如賊機巧貪取是身如囚常被縛戮是身如寃不可愛樂亦如魁牘能斷其命又復此身如空聚落中無有我如陶家輪無暫停止如滓穢瓶不淨充滿身如癰疽枉唯痛楚身如朽宅不久遷壞身如漏船無堪濟渡身如坏器漸當沮壞又復此身如河岸樹必爲駛流之所漂動身如旅泊多諸艱苦身如邸舍妄執主宰如伺盜者常生暴惡乃至是身如癡小兒要當守護彼經復說如是種種不淨之身由我慢愚癡妄爲光潔智者所觀猶如穢瓶眼鼻口等眵涕流出來云何於此多生貪慢又彼偈云

如愚癡童子 洗炭欲令白 設盡此生中  
求白不可得 亦如無智人 洗身欲令潔  
屢加於澡沐 至死不能淨 菩薩觀於身  
九竅瘡疤門 八十千戶蟲 依身而所住

菩薩觀於身 如刻木衆像 筋骨假連持  
應知無主宰 菩薩觀於身 或受他飲食

應知同狐狼 來食自身肉

論曰由飲食資助成廣大行如是處處應當了知受念處者如寶髻經說善男子菩薩以受觀受念處了知衆生依止大悲得如是樂若一切衆生無有解脫應當修習以受觀受念處我當被大悲甲攝受調攝一切衆生悉以彼樂滅除衆苦我以大悲令食行衆生了知樂受離於貪染我以大悲令瞋行衆生了知苦受離諸過失我以大悲令癡行衆生了知不苦不樂受捨俱生癡又彼樂受不壞苦受不減不苦不樂受離於對治則無無明若無無明彼何名受云何了知一切無常及無我等然此樂受卽無常性苦受卽逼迫性不苦不樂受卽寂靜性由此了知若樂若苦無常無我等又無盡意經云若受苦時當念一切惡道衆生起大悲心攝持於瞋離於顛倒分別受等又法集經偈云

說受爲領納 領納復爲誰 受者離於受  
差別不可得 智者觀於受 住如是念處  
彼相如菩提 光明遍寂靜

大乘集菩薩學論卷第十六

論曰此略說受念處次明心念處者如寶積經說佛  
言迦葉波謂於此心或生愛樂或起厭患或多封著  
於彼三際云何伺察若過去則已滅現在不住未來  
未至非內非外亦非中間皆不可得又此心者不可  
色見非所詮表亦非對治非觀非照無住無著然此  
心者一切如來尚無所見餘何能觀無別境界唯法

法稱菩薩造

宋西天三藏朝散大夫試鴻臚少卿憲大師日稱等奉詔譯

念處品第十三之二

論曰此略說受念處次明心念處者如寶積經說佛  
言迦葉波謂於此心或生愛樂或起厭患或多封著  
於彼三際云何伺察若過去則已滅現在不住未來  
未至非內非外亦非中間皆不可得又此心者不可  
色見非所詮表亦非對治非觀非照無住無著然此  
心者一切如來尚無所見餘何能觀無別境界唯法

想轉迦葉波是心如幻遍計不實由所取故種種得  
生心如虛空爲諸煩惱及隨煩惱客塵所覆心如河  
流生滅不住心如燈光因緣所起心如擊電剎那不  
住心如惡友能生諸苦心如漁師苦爲樂想心如鬼  
魅作諸燒惱心如藥叉伺噉精氣心如狂賊壞諸善  
根心如燈蛾常眄其色心如鼙鼓唯警鬪戰心如婢  
僕貪嗜殘味是心如蠅觸羶膩器是心如猪於不淨  
中謂爲香潔佛言迦葉波求是心者了不可得由不  
可得故無所得於過現未來皆不可得則能超越三  
世有非有等又寶髻經云然此心者非外所有故不可  
見於蘊處界亦不可見如是尋求不可見者由何  
所緣數數得起謂彼彼心緣如是事云何說爲心不  
可見應知是心如利劍刃何能自斷又復此心亦如  
指端指豈能說心不可見亦復如是乃至如人遠行  
其身輕轉迅疾如風所至境界無能障礙善男子若  
人於此六處境界自他繫屬心無愛著身不散亂則  
於奢摩他心一境性得無障礙是爲心念處又無盡  
意經說以相應行修習莊嚴於法性心而不減失云  
何莊嚴彼法性心同於幻化謂若自捨一切所有而  
能回向彼法性心是爲嚴淨諸佛刹土法念處者亦

如彼說菩薩於法不觀法行法無可觀故若非佛法  
非菩提道則一切法皆非此離了知此已得大悲三  
摩地於一切法非有煩惱非無煩惱得三輪無想所  
以者何了諸法性無有二相是諸煩惱無積聚性無  
貪性無瞋性無癡性若能如是悟菩提者了煩惱性  
卽菩提性是爲法念處又寶髻經云善男子菩薩以  
法觀法念處若法起卽生法謝卽滅謂於法爾我人  
衆生壽者養者士夫補特伽羅意生儒童生老死等  
若集卽集行若不集卽不集行若善不善及不動行  
未有少法無其因緣而得生起乃至於是法處深所  
伺察不捨一切智菩提心故如大戲樂經云此有爲  
行唯心造作猶若坯瓶無常散壞行如空城爲雨沮  
壞泥塗不堅漸當磨滅亦如河岸積沙所成自性怯  
弱爲水流蕩行如風燈生滅不住行如聚沫不可撮  
持行如芭蕉中無有實復如空拳詎示愚駢乃至或  
草葛等搓撚爲繩依瓶轆轤而能汲引未嘗獨一有  
彼作用一切有支互相依止聚集而轉是前後際亦  
不可得如人鑽火二手與木勤劬不息火乃得生衆  
緣若離火勢隨滅於如是行印所印已若自若他卽  
能超越斷常等行如智商人於諸險道所至方隅而

得通達

論曰由無明愛等煩惱業緣之所招集成蘊處界於勝義中皆不可得

自性清淨品第十四之一

論曰說念處已次復入解補特伽羅決定成就相應空性斷根本已餘煩惱等不復集行又如來祕密經云佛言寂慧譬如樹名鉢羅奢若斷其根卽一切枝葉悉皆枯瘁寂慧此亦如是若斷身見卽能除滅一切煩惱

論曰分別空性有無量行相如月燈經偈云

若人信解如來教

於佛戒學無毀犯

悉能遠離諸女人

知法自性常空寂

拔除一切憂苦箭

或施醫藥令安穩

速得成斯二足尊

知法自性常空寂

若於身命斷支節

杖木捶打無恚惱

忍力最上人中月

知法自性常空寂

設百生中墮惡道

常得住持妙色相

亦復獲是五神通

而常安住諸佛所

又般若經云復次舍利子菩薩摩訶薩欲成就佛身三十二大人相及八十種好者於一切生中當念菩

提心無令損壞於菩薩行得無忘失離惡知識及諸過咎親近一切佛菩薩衆善知識等爲欲降伏諸天魔衆淨諸業障於一切法得無障礙當學般若波羅蜜多復次舍利子菩薩摩訶薩如是發一念心悉能超越東方碗伽沙等世界一切方所當學般若波羅蜜多復次舍利子菩薩摩訶薩設住十方佛刹當學般若波羅蜜多亦如是說乃至廣如諸法無我滅業障縛則見諸法自性無滅如父予合集經云佛言大王如是六界及六觸處十八意所伺察是補魯沙爲緣得生云何六界所謂地界水界火界風界空界識界云何六觸處謂眼觸處而見於色若耳觸處得聞其聲若鼻觸處能艱於香若舌觸處悉嘗於味若身觸處親覺其觸若意觸處則知於法云何十八意所伺察謂眼見色已若生適悅若生憂惱若住於捨如是六根各各緣彼適悅等三是名十八意所伺察大王云何爲內地界謂於內身所生硬澀髮毛爪齒等若內地界不生亦無有滅則無集行大王若時女人而於內身如所思惟彼補嚕沙彼補嚕沙亦生愛樂由二和合羯邏藍生又復如所思惟相似和合而得生者無有是處若二女人無有是處二補嚕沙無有

是處若彼彼思惟而得生者亦無是處自性無實非  
相應故云何說此爲堅硬性大王此堅硬性相似而  
立畢竟此身潰爛散滅唯壞壞間是所歸趣彼堅硬  
性從何所來亦非四方上下而去大王此內地界應  
如是知

## 大乘集菩薩學論卷第十七

### 音釋

綈 直利切 跟 古痕切 跺 胡毛切 脳 時充切 骨 部禮  
密也 官股切 兩 也 髓 肾官切 間也 骨股也 腹 腹陽也 骨  
也 骨股切 間也 骨股也 腹 腹陽也 骨股也 骨 部禮  
吉 脊切 骨 骨切 間也 骨股也 腹 腹陽也 骨股也 骨 部禮  
面旁也 骨 骨切 間也 骨股也 腹 腹陽也 骨股也 骨 部禮  
髑 頸上徒木切 骸 五駭切 搓 挪也 摧 指滅物也 駕 疾士  
髑 頸上盧谷切 下落胡切 骸 骸骨也 搓 挪也 摧 指滅物也 駕 疾士  
驢 汲井圓轉木也 骸 骸骨也 摧 挪也 摧 指滅物也 駕 疾士

論

大乘集菩薩學論卷第十八

大乘集菩薩學論卷第十八第十九二同卷轉九

法稱菩薩造

朱西天三藏朝散大夫試溫臘少卿賓梵大師日舞等奉詔譯

自性清淨品第十四之二

大王是外地界堅硬性者爾時世間初建梵天所居宮殿大寶所成復生他化自在諸天所居宮殿皆七寶成大王若無地界堅硬性生彼何所來復成大地厚八萬四千踰繕那縱廣六萬踰繕那復生輪圍大輪圍山堅固安住同一金剛復生蘇彌盧山庾健陀山顛泥陀山伊舍陀山乃至黑山如是三千大千世

南

車八

界次第成已堅固安住若無地界堅硬性生彼何所來大王又此世界欲壞滅時或爲火焚或爲水漂或爲風吹而此大地爲火燒時譬然酥油其焰彌熾乃至煤燼不復可見若爲水漂如投鹽水中尋卽消壞若爲毗嵐風所吹時彼三千大千世界悉皆散壞淨盡無餘大王此外地界生時本空滅時亦空自性空故無有男相亦無女相但唯言說之所顯示如是地界與地界性皆不可得如實正慧而能了知云何內水界若此身內所有執受濕潤等性彼復云何所謂涎汗涕唾暗髓膿血溲便等物爲內水界大王若時忽見親愛人等眼中流淚或爲苦惱所逼流淚或聞深法信重流淚或爲寒風所吹流淚如是水界從何所來水相乾時復何所去乃至此界壞時徧生黑雲三十二重彌覆三千大千世界於虛空中降澍洪雨點大如象晝夜傾注相續不絕如是時分經五中劫其水積滿上至梵世大王比大水界從何所來又此世界將欲壞時有二日出二日出已小河泉源悉皆乾竭三日出時無熱惱池流出四河亦皆枯涸四日出時大海水減一踰繕那或二或三漸次減少至十踰繕那或二十踰繕那次第枯竭至八十踰繕那有

餘水在或深一多羅樹或深至胸臆或深如牛跡乃至少水深一指面當爾之時大海中水悉皆乾竭淨盡無餘大王此水界相生無所來滅無所去生時本空滅時亦空自性空故無有男相亦無女相但唯言說之所顯示如是水界與水界性皆不可得云何身內火界若此身中所有執受溫熱等性彼復云何所謂溫暖蒸熟咀嚼飲食成熟變壞使令安樂入熱數者名內火界云何外火界謂不執受溫熱相生若復有人於曠野中尋求火緣或以蒿艾或牛糞屑或兜羅綿引火生已或燒草木山林聚落及餘方處皆爲所燒大王如是火界生無所來滅無所去從本已來自性離故云何身內風界輕動等性彼復云何謂此內風或時上行或時下行或住腹間或脇或背或發隱疹或聚成塊或如刀裂或如針刺出入息等徧滿身肢外風界者謂若此風從四方來或緊如箭或利如刃若狂暴起摧折林木墮裂山峰若微細起飄舉身不動多羅樹名外風界餘如前說云何內空界若此身內皮肉血等顯現增長離質礙性彼復云何謂若眼竅耳穴面門咽喉嚥噉飲食所引滋味於腸胃間通徹而出若時業緣引生六處諸處生已圍繞空

界此說名入內空界數然彼空界從何所來若復外所顯現離質礙性名外空界大王若色變壞一切皆空所以者何是虛空界本無盡故安住不動猶如涅槃徧一切處無有障礙大王譬如有人於彼高原穿鑿池井於意云何是池井中所有空相從何所來王言無所從來佛言大王設使彼人復填以土於意云何空何所去王言空無所去所以者何是虛空界無去來故不住男相不住女相大王外虛空界本來無動所以者何自性離故如實正慧而能了知復次大王云何識界謂若眼根爲主各別所緣顯色形色及以表色名眼識界若六根爲主緣於六境各別建立名六識界又此識界不著於根不住境界非內非外及二中間然此識界各各了別彼彼事已卽便滅謝生無所來滅無所去大王識生時空滅時亦空自性空故不住男相亦非女相但唯言說之所顯示如是識界與識界性皆不可得如實正慧而能了知大王云何眼處謂四大種地界水界火界風界所造淨色若地界清淨則眼處清淨若水火風界清淨則眼處清淨何以故由地界清淨眼處得生是中無有少法可得如是乃至由風界清淨眼處得生是中無有少

法可得何以故無主宰故無造作故猶如涅槃自性淨故大王如是眼處各各尋求皆不可得所以者何由地界空故則地界清淨乃至風界空故則風界清淨若諸法自性本空則彼界何有清淨亦無忿諍若淨若諍皆不可得復有何色而可見耶當知眼處畢竟空故自性亦空前際後際皆不可得未來所造亦不可得何以故自性離故若自性無有則無男相亦無女相何有愛樂若生愛樂是魔境界若無愛樂是佛境界何以故若無愛樂則能遠離一切諸法大王云何耳處謂四大種所造淨色乃至大王諸法解脫決定現前如法界空不可施設不可顯示不可記別無所希望大王諸根各各樂著境界眼緣於色境有三樂著是故說色爲眼境界又此眼根緣於色境有三種相觸可愛色起於貪想不可愛色起於嗔想非愛非惡而起捨想如是乃至意著法處爲意境界若彼意處緣可愛色極生樂著爲彼所牽引生貪行不可愛色生於嗔行於愛非愛起於癡行如是聲等三種攀緣領納等相准前應說大王當知諸根如幻境界如夢譬如有人於睡夢中與諸綵女共相娛樂大王於意云何彼夢覺已憶念夢中綵女娛樂爲實有不

王言不也世尊大王於意云何是人所夢執謂爲實爲智者不不也世尊何以故夢中所見衆人綵女畢竟無有何況與之共相娛樂當知是人徒自疲勞念夢中境不復可得佛言大王如是如是愚癡異生眼見色已心生愛樂復起執著爲彼所牽造貪業行身業三種語業四種意業三種最初造作剎那滅謝不依東方南西方四維上下中間而住於死邊際命根滅時自分業報皆悉現前猶如夢覺念夢中事大王識爲其主業爲攀緣二種相因初識生起或趣地獄或墮旁生琰摩羅界及阿蘇囉若人若天初識生已各受其報同分心品相續隨轉最後識滅名爲死蘊最初識起名爲生蘊大王當知無有少法從於此世得至他世所以者何性生滅故大王身識生時無所從來滅無所去彼業生時無所從來滅無所去初識生時無所從來滅無所去何以故自性離故如是了知身識身識空自業自業空初識初識空若滅滅空若生生空了知業縛無有作者亦無受者但名想耳復次大王譬若有人於睡夢中與諸冤對共相鬪戰於意云何是人覺已憶念夢中鬪戰等事爲實有不王言不也世尊佛言大王於意云何是人所夢執

謂爲實爲智者不不也世尊何以故夢中畢竟無有  
冤對何況與之共相鬪戰是人徒自憂惱都無有實  
佛言大王如是如是愚癡異生眼見惡色卽生於憇  
厭離破壞毀呴過失造瞋業行餘同前說復次大王  
譬若有人於睡夢中爲毗舍遮之所嬈害心生怖畏  
癡迷悶絕大王於意云何是人覺已憶念夢中爲鬼  
所嬈爲實爾不不也世尊夢中畢竟無鬼所惱況癡  
耶佛言大王如是如是愚癡異生眼見是色癡迷  
不了造癡業行餘如前說復次大王譬如夢中得聞  
衆人美妙謌聲箜篌絃管諸音樂等大王於意云何  
是人覺已憶念夢中所有歌舞爲實爾不王曰不也  
世尊佛言大王於意云何是人所夢執謂爲實是爲  
智不不也世尊何以故夢中衆人尚不可得何況美  
妙諸樂音聲是人徒自疲勞畢竟無有佛言大王如  
是如是愚癡異生聞可意聲聞已適悅復生樂著造  
貪業行如是香等各各三種准前應知乃至大王於  
此法中善自安意應作是念我當云何於人天中爲  
作眼目爲大燈炬而作照明爲作船師令渡彼岸爲  
大商主引至寶處未解脫者今得解脫未安隱者令  
其安隱未涅槃者令證涅槃大王當知諸根如幻境

界如夢凡夫縛著無有厭足乃往過去無量世時有轉輪王名無量稱威德名聞富貴自在統四大洲獨爲尊勝隨所意樂而得受用一切林樹常有花果時世人民安隱無惱復能降雨衆妙香水金銀珍寶種種資具諸有所須普皆充足忽於一時昇忉利天帝釋天主分座令坐貪欲無厭欲侵其位作是念已卽便退沒羣臣圍繞咸共見之譬如生酥置熱沙中不得久住將趣命終爾時有王名曰作愛見是事已而作是言我當云何於諸世間善說斯事時無量稱語作愛言汝於未來當如是說彼無量稱貪無厭故自取命終乃至是故大王諸根如幻境界如夢當自安意勿生信順身如陽燄自性無有色受想行自性不實亦復如是

大乘集菩薩學論卷第十八

大乘宗著錄學編卷第十八

寶水真歌

大乘集菩薩學論卷第十九

法稱菩薩造

宋西天三藏朝散大夫試鴻臚少卿宣梵大師日稱等奉 詔

自性清淨品第十四之三

論曰此說依世俗勝義建立諸法當如是知若時世尊以一切智觀察世間現證了知依世俗說則有六趣若天若人及阿蘇囉地獄餓鬼傍生上下種族受報貧富衰盛苦樂及以毀譽色無色等種種相生若時如來出現世間諸衆生等於善逝所發生淨信樂勝義說是時如來爲利衆生如證而說諸法之實無

有造作無有分別無有知覺無有顯示亦無言說如是諸法一切皆空若如是者云何世尊復說受記無上正等菩提於此法中以何爲色復何名爲受想行識而能記別無上正等菩提由是了知色本無故則菩提無生乃至識本無故亦同是說於諸法中皆無所得何名爲佛何名菩提何名菩薩何名受記若色空乃至若識識空但依世俗剎那建立如是言說但名想耳智者於此勿生嗔惱如世尊說諸法實際畢竟無盡彼樂變化天不解深義執我爲有亦無障礙世尊復說諸法菩提自性離故若能覺了卽是親近無量菩提所以者何若離菩提則無涅槃若無涅槃樂欲則無輪回可怖世尊如樂變化天所執有我不可得故況復實際而可得耶時娑婆界主聞佛說已卽生領解說伽陀曰

如人夢中飢所逼 縱食百味飽何有  
了斯夢相本來空 諸法自性亦如是  
如人善說諸言論 聞已咸生於愛樂  
若言若愛二皆無 是中不復生疑惑  
譬如琴瑟發妙音 彼聲自性無所有  
了知蘊愛亦同然 妙慧推之不可得

譬如商珂大音樂

聞已尋求何所生

彼聲自性本來空

則了大仙一切法

譬如上味諸餚餚

食已資身使充實

如是身味本來無

則了大仙一切法

譬如天帝現寶幢

諸天咸覩生愛樂

了知是相本來空

則了大仙一切法

譬如有人分地界

強名城邑本來無

亦若身城自性空

則了大仙一切法

譬如集會人擊鼓

衆共聞已生忻悅

彼聲自性本來空

則了大仙一切法

又如擊鼓藉緣生

若無濕潤聲彌震

尋求是相何所來

則了大仙一切法

復如擊鼓出洪音

彼無思慮及呼召

如是分別本來無

則了大仙一切法

論曰此復明前義謂眼等諸法自性無有若諸法無有則無成辦若無成辦則無生滅乃至眼根所緣三相愛非愛等皆不可得無有言說亦無表示譬如空拳舉示小兒但誰於彼都無有實至於名量亦不得此勝義空決定無有如人夢中爲彼大仙現威猛相而斷其首智者覺已了知一切皆自識現由是解

脫如大樹緊那羅王問世尊言若所說法悉皆是空云何世尊與我授記我亦不知自住樓閣不增不減亦不散壞受用無盡是相云何佛言如當了知彼一切法自性清淨法界本空猶如鏡中現其影像如造車輪聚集而顯我說作業自性亦爾又如林樹由風所吹兩相摩擊而發於火如是思惟火何所得我說作業亦復如是如說有人壽滿百歲應知無有積聚年歲而可見也又如法集經說眼之與色本無有諍如是耳聲乃至意法亦無有諍云何眼色無有所諍以二和合不相違故乃至意法二相和合亦復如是若不和合則有所諍世尊法無有二是故不諍諸法無二各不相知由不相知則無分別若離分別則無生滅無有增減不生愛樂亦無厭患不住輪回不著涅槃世尊若於諸法不樂不厭應知則無染淨等相世尊若言如是我知如是我覺皆是虛妄之所分別世尊若復於此眼等諸法善了知已不作是念我能分別當知是人不與物諍則能隨順沙門道行爲見法者爲見佛者爲見衆生者爲見空性者世尊見無所見是名諸法無見彼經又云無所發菩薩問曰如如空者於法何說佛言彼如如空不生不滅若是

者諸法皆空時無所發菩薩言如是如是是故世尊說一切法皆無生滅世尊何故復說有爲諸法悉皆生滅若如是者則佛之塔廟決定生滅善男子如來大悲爲除世間衆生驚怖隨順宣說生滅之法是中無有少法可得況生滅耶如般若經云具壽須菩提無生法者何名無生須菩提言舍利子生無所生是無生法

論曰此名積集清淨福行而成菩提以清淨慈緣於有情善觀察已無衆生相若復供養十方善逝彼二足尊已離垢染亦不可見應當供養苦惱衆生是調御師之所教勑人中上供而以施之以大悲心拔除衆苦獲安隱樂發生淨慧斷除煩惱於此正理善了知已當離疑惑如是供養果不難得了佛正教如教觀身念入聖道斷諸癡染當捨己身承事諸佛不希世間諸天妙樂修奢摩他毗鉢舍那若寂遍寂爲出苦道

云何建立世俗諸法謂於虛妄處和合相應凡夫迷倒謂爲子想依止成就說勝義空處則無是相以一切法本無生故如無垢稱經說文殊師利問維摩詰曰虛妄分別以何爲本曰顛倒想爲本又曰顛倒想

論曰無住爲本又問無住孰爲本曰無住則無本文殊師利從無住本則能建立一切諸法又般若經云應當捨家安住勇猛斷除煩惱心淨平等修習般若波羅蜜多又法集經云善解空者心不依止世間所有利衰稱譏忻感毀譽於諸苦惱不生厭患於諸快樂不生愛著不爲世法之所破壞善解空者則了空性無有少法而生取捨若無取捨則無貪厭此則名爲善見空者善知空者於一切法無有執著若無執著則於諸法無有所諍

論曰此明刹那心得清淨謂由我慢輕捨衆生了知我見本來無有彼若一心專注能斷是人速疾心得清淨如是觀察於一切處諸衆生所常樂尊重離於攀緣及所分別自他平等何有相違如是行學斯不爲難譬若如意摩尼寶珠人所愛樂非能自貴是故於他當生尊重謂由顛倒分別執著於有情邊而生慳惥或生毀訾皆由我慢之所纏縛以是緣故多生讚毀增長熱惱如阿鼻然是聲無心讚讚何有此妄慧起彼適悅生何於他言而生於愛他喜若生非我有故常樂平等自取安靜解分別縛離讚毀相如是了知都無果利又於財利多生喜惱慣習慳嫉機巧

希求順違二種俱獲重罪隨順正理當起對治摧我慢峰心速清淨離語言過專樂寂默唯除教誨相續顯示了諸妄法無有堅實生苦之本不得久住

正命受用品第十五之一

復次長者若在家菩薩當樂正命平等受用遠離非法邪活命等如寶雲經說云何菩薩於施者所不以身業假現威儀若舉足時不詐徐步若下足時不作瞻視現思惟相云何菩薩語不矯詐不爲利養而現細語柔軟語愛語隨順語云何菩薩心不謗曲不爲利養語現少欲心廣貪求內懷熱惱云何菩薩善能捨離爲利養故而現異相若見施者終不自言我乏衣服卧具飲食病緣醫藥願垂惠施云何菩薩善能捨離爲利養故虛言鼓動若見施者不作詐言某甲施主持如是物而施於我我以某物而報彼恩又言以我少欲持戒多聞故施我起悲心而攝受之乃至身行惡者爲利養故奔走往來而破禁戒若見餘人同梵行者所得利養與心損壞是名菩薩離於險惡而求利養云何捨離非法利養謂此菩薩不以斗秤而行欺誑他所委信不生侵損云何捨離不淨利養謂此菩薩於窣堵波若法若僧所有之物不作互用

若有所得亦不肯受云何捨離耽著利養謂此菩薩所得之物不攝於已不自衒富亦不積聚隨時而施沙門梵志婆羅門等或施父母親眷朋屬或自受用若受用時不生染著若時菩薩不獲利養心不生苦亦無熱惱或復施者無有所施菩薩於彼不生嗔心又無盡意經說無有衆生不堪受施如其所許持用施之有來乞者不起惱施不爲他人逼迫而施無勞倦施無異相施無輕易施無背面施無棄擲施無不敬施無分別施無不自手施無不依時施無不平等施無惱衆生施又如最上授所問經云菩薩行布施波羅蜜多時若有人求乞所須物當依我作而給與之若樂酒者使生正念卽與具飲後復令斷如是菩薩清淨方便攝受衆生若其內心愛樂不捨菩薩卽爲種種訶毀酒之過失如利刀劍決定遠離不令相續如是施者則無過咎

論曰此說施行清淨漸令趣入如餘經中廣明制斷如虛空藏經云所謂我清淨施我所清淨施因清淨施見清淨施相清淨施種種性清淨施刹那果報清淨施心等如空清淨施乃至譬如虛空無有邊際菩薩行施亦復如是譬如虛空寬廣無礙菩薩行施廣

大回向亦復如是譬如虛空無有色相菩薩如是離色行施亦復如是譬如虛空無想無作無表無相菩薩行施亦復如是譬如虛空徧諸佛刹菩薩大慈緣諸有情廣大行施亦復如是譬如虛空含容一切菩薩行施攝諸有情亦復如是乃至如變化人施變化者無有受用亦無分別意達諸法無所希求離我我所自性清淨以勝智慧斷諸煩惱以方便智不捨有情是爲菩薩修行布施波羅蜜多猶若虛空

大乘集菩薩學論卷第十九

轉九

大乘集菩薩學論卷第二十

法稱菩薩造

朱西元藏朝故大夫試溫臘少卿梵天師賜紫沙門曰稱等奉

詔譯

正命受用品第十五之二

論曰此復明尸羅清淨如虛空藏經云遠離聲聞辟支佛心於菩提心不生退轉則於尸羅而得清淨善男子譬如虛空體性清淨菩薩清淨持戒亦爾虛空無垢菩薩持戒無垢亦爾虛空寂靜菩薩持戒寂靜亦爾虛空無壞菩薩持戒無壞亦爾又如虛空無能過勝菩薩持戒於有情中無有勝者又於虛空清淨

平等菩薩行忍於諸有情平等和合清淨亦爾譬如有人手持利斧入娑羅林斷其枝葉當知彼樹無有嗔恚不生分別誰能斷者亦不分別誰所斷者菩薩行忍亦復如是是爲菩薩最上忍辱猶如虛空又寶髻經說身精進清淨謂若此身猶如影響所有言說自性無記了知是心畢竟空寂當以大悲被慈甲胄具足諸行深修禪定於功德法無令缺減以菩提心觀諸衆生無有缺減樂行布施乃至方便無有缺減於慈悲喜捨深心相應無有缺減於布施愛語利行同事無有缺減於正念知無有缺減於念處正勤神足根力覺支聖道無有缺減乃至於奢摩他毗鉢舍那無有缺減捨業煩惱自性無知修檢其身無令縱逸常勤佛事成熟有情咸得清涼安住寂靜善男子是名菩薩修禪波羅蜜多行清淨如是乃至智慧波羅蜜多當如是知

### 增長勝力品第十六之一

論曰此明三種增長勝力謂於所行行常無厭足所度衆生不生懈退求佛妙智堅固勇猛是三種力非諸聲聞所能行故如寶雲經說以諸衆生自性怯弱唯除菩薩顯現增長又如來祕密經說時阿闍世王

復白佛言世尊菩薩具修幾法卽能獲得如是勝力  
佛言大王菩薩若修十法獲斯勝利何等爲十一者  
菩薩寧捨身命終不棄捨無上正法二者於一切衆  
生作謙下想不增慢心三者於彼劣弱衆生起愍念  
心不生損害四者見飢渴衆生施妙飲食五者見怖  
畏衆生施其無畏六者見疾病衆生施藥救療七者  
見貧乏衆生惠令滿足八者見佛塔廟形像圖拭圓  
淨九者出歡喜言安慰衆生十者見彼負重疲困苦  
惱衆生爲除重擔菩薩若具如是十法卽能獲得如  
是最勝之力又海意經說菩薩若能發起精進常所  
堅固勤行樂欲所起精進無有休息而諸菩薩卽於  
阿耨多羅三藐三菩提不爲難得何以故海意由精  
進故乃得菩提若懈怠者於佛菩提遠中復遠無懈  
怠者能行布施乃至無懈怠者能集智慧如月燈經  
云猶如水中生優鉢羅花應知次第而得增長當漸  
修學布施等行如能斷金剛經云若菩薩善住布施  
所獲福聚不可稱量又如大般若說復次舍利子若  
菩薩摩訶薩樂欲修習般若波羅蜜多非少布施而  
得圓滿應當施與一切衆生金銀珍寶園林舍宅種  
種所須隨其意樂以一切相智方便善巧而能廻向

無量阿僧祇一切衆生當學般若波羅蜜多論曰此明大悲空藏自性清淨受用福聚速疾增長若無大悲非菩薩行建立諸善此爲根本如是深心堅固大悲現前勇猛修作諸相應行則能獲得尸羅清淨故有頌云

如人善鬪戰 利器心堅勇 若小有懈退

則爲彼所執

又如善財往詣聖慈善知識所卽自念言而我此身於過去世無勇猛心無堅固意無清淨因受諸輪轉心樂流蕩顛倒分別自邪思惟樂習欲行取著世間無利事業或於自身所獲義利起不平等悉皆棄捨於現在世起大勇悍據擇分別真實思惟於諸菩薩所行正行當勤修作於諸衆生起增上心多所饒益於諸佛所發大精進作大善利莊嚴諸根增長願力讀誦經典心淨信解攝持身心不生高舉常樂出離生老病死憂惱苦海而於後際樂行菩薩所行之行應當往詣一切佛刹敬受如來之所教誨親近供養善說法師樂求相應諸佛正法承事供給諸善知識開示演說一切佛法菩薩若能如是思惟觀察則能增長願力智身度脫衆生植衆德本如無盡意經說

菩薩獨一無侶勇猛堅固畢竟攝取阿耨多羅三藐三菩提深心自修不假他作以精進鎧而自莊嚴如諸衆生所作善業我亦如是悉當作之及諸菩薩從初發心所修諸行我亦當行施非我伴我是施伴戒忍精進禪定智慧非是我伴我是彼伴諸波羅蜜不能使我而我能使諸波羅蜜一切善根皆亦如是乃至於金剛坐道場壞諸魔衆一剎那頃以平等相應慧得成阿耨多羅三藐三菩提如金剛幢經說如日天子出現世間獨一無侶所歷境界而無退轉於生盲者不生厭患於羅睺阿修羅王不生厭患於乾闥婆城不生厭患於閻浮提方處穢惡不生厭患於四天下地界微塵不生厭患於諸高山煙雲等障皆無厭患菩薩摩訶薩出現世間亦復如是以無分別智正念了知若爲衆生之所損害不生厭患心無退轉若於菩薩廣大善根而生嫉妬菩薩於彼不生厭患心無退轉若復衆生爲邪見垢之所染汙菩薩於彼不生厭患心無退轉若見衆生常爲瞋恚之所纏縛菩薩於彼亦不遠離若見衆生愚癡覆障煩惱垢重而復破壞菩提種子一切世間無能救護菩薩於彼不生輕慢何以故菩薩大悲不見衆生有過失故猶

如日輪出現世間皆令明顯無有障礙若復衆生愚癡所覆不信諸佛不聞正法不識僧田自所造作種種苦因或墮地獄旁生鬼界是時菩薩見彼衆生造是業已心不動亂亦不揀擇無有驚畏發堅勇心不生退轉決定代彼受諸苦惱所以者何我當荷負彼諸衆生乃至世間生老病死苦惱之難入無暇難諸輪迴難諸惡見難壞善法難生無智難我當畢竟令脫是難是諸衆生無明所蔽愛網所著有結所縛諸苦籠紏不生覺了無求出離常懷疑惑與願相違於輪迴海一向漂沒我當安住一切智王令諸衆生成就義利皆得解脫唯我一人能爲救護假使一切世界悉爲惡趣受苦衆生充滿其中以我所集一切善根平等回向無不與者乃至最後邊際所經時分一惡趣消滅無餘一一衆生皆得解脫若使一人未離苦者我當以身質而出之願諸衆生因我身故得盡苦際獲安隱樂各各樂出真實語言勿相欺誑不生損害我當令發一切智心離五欲境行菩薩行畢竟安住無上正等菩提所以者何是諸衆生由著欲故攝屬魔境諸佛世尊之所呵毀當知貪欲衆苦之本以是緣故或作諍訟或相鬪戰起諸煩惱後墮地

獄餓鬼畜生乃至斷生天業遠離諸佛何由能發無上智王是諸衆生爲欲所沒熾然燒煮無量過患我以善根平等回向令諸衆生皆悉捨離樂求佛智得涅槃樂我當爲彼作大導師以方便智令達彼岸又如日出照四大洲於諸境界咸令顯現若王宮殿聚落城邑人民往來所作事業成熟苗稼滋榮草木是日天子光明威德獨出世間決定無二如是菩薩從初發心見諸衆生不種善根卽作是念我當救護一切衆生我當解脫一切衆生我當照明一切衆生我當教誨一切衆生我當入解一切衆生我當攝受一切衆生我當成熟一切衆生皆令安隱斷諸疑惑又如日輪出現世間光明普照不假他求菩薩摩訶薩亦復如是出現世間見苦衆生不待他請而方救護無少善根而不回向以諸衆生而爲莊嚴又無盡意經云菩薩不計劫數而求菩提從生死本至于今日所經時分不可稱量於若干劫而作莊嚴乃至一觀諸佛一發道心所經諸佛如毘盧沙門事供養無有懈倦方能解了一切衆生心之所行是名菩薩無盡莊嚴如是修習檀波羅蜜菩提分法而能具足相好莊嚴又寶雲經云菩薩見諸衆生盲無慧眼聾悞難

調破戒嬾惰衆惡悉具是時菩薩深起厭離求生淨土願我不聞諸惡之名作是念已復更思惟是諸衆生愚癡瘡啞無涅槃分不生信心遠離諸佛我當調伏而救拔之發是心時一切魔宮悉皆震動十方諸佛同聲讚歎是人不久坐於道場得阿耨多羅三藐

三菩提

論曰如是漸次思惟觀察則能增長無量福聚應當質直深心堅固修作如法集經說於佛法中質直爲本若諸菩薩無質直心則是遠離一切佛法若是具足深心堅固於未曾聞深妙之法而生渴仰或於空中山林樹間自然出於深妙法音而得解了是故菩薩當如是行如人有足則能遊行菩薩若具質直深心而能修行一切佛法如人有身則有壽命菩薩若具質直深心則能獲得諸佛菩提如人有命則有財利菩薩若具質直深心而得獲得諸佛聖財譬如大炬其焰熾然菩薩若具質直深心於諸佛法則能明了譬如有雲則能降雨菩薩若具質直深心則能宣布諸佛法雨是故菩薩應當了知質直深心善自守護譬如樹根腐敗則不能生枝葉花果菩薩若無質直深心於諸善法不復生長亦不能取諸佛菩提

大乘集菩薩學論卷第二十

音釋

毗嵐

梵語也此云迅猛

毗

疏鳩切

枯涸

涸下各

乾竭

頻脂切嵐盧舍切

洩

溺切

枯涸

切

也

也

也

也

也

咀嚼

咀慈呂切

嚙

於向

喰

徒濫切

矯

天切

駕切

欺詐側

窣堵波

梵語也此云方墳窣

堵都古切

大乘集菩薩學論卷第二十一

第二十一  
二同卷

轉十

法

稱

菩

薩

造

菩薩

學

論

卷

第二十一

轉十

增長勝力品第十六之二

論曰云何名爲深心覺了無盡意經云復次是心於諸所作離欺詐故離欺詐者不起諂故不起諂者能決定故能決定者除誑幻故除誑幻者住清淨故住清淨者常正直故常正直者無邪曲故無邪曲者性明了故性明了者善悟解故善悟解者得真實故得真實者不可壞故不可壞者獲堅牢故獲堅牢者得

菩薩

學

論

卷

第二十一

轉十

南

不動故得不動者不捨衆生故此說是爲深心覺了  
是經復說最上殊勝深心修習安住寂靜慈覆衆生  
於賢善者恭敬尊重非賢善者悲心濟拔無拯護者  
爲作拯護無依歸者爲作依歸於漂泊者爲作洲渚  
無主宰者爲作主宰無伴侶者爲作伴侶於邪曲者  
使令正直於暴惡者使令柔順於諂諛者使令中正  
於虛誑者使令誠諦於姦宄者使令淳質不知恩者  
使令知恩於苦惱者令得安隱不饒益者爲作饒益  
於我慢者使令謙下於毀訾者使令讚美於錯謬者  
爲作教詔無守護者爲作守護於相違者不見過咎  
於諸師尊起清淨行方便善巧等心恭敬於所教誨  
憶持不忘

論曰如是漸次深心修作則能增長勝力大悲現前  
如法集經云爾時觀世音菩薩白佛言世尊菩薩修  
學不須多法若持一法則能善知一切佛法是一法  
者所謂大悲若諸菩薩能行大悲則能攝取一切佛  
法如在掌中世尊如轉輪王所有輪寶隨其所至皆  
悉隨從菩薩若起大悲則於諸佛法自然獲得亦復  
如是世尊譬如日出光照世間諸有情類所作事業  
皆得成辦菩薩若以大悲照於一切菩提分法則易

修作亦復如是世尊譬如諸根以意爲本悉能取於自分境界菩薩住於大悲則於一切菩提分法各各修作如理而行世尊譬如依彼命根有餘諸根菩薩若有大悲則能修諸菩提分法又無盡意經云譬如人之命根以出入息而爲其本如是菩薩修學大乘卽以大悲而爲其本又如長者唯一子愛念情重未曾暫捨菩薩獲得大悲於諸衆生愛之若子亦復如是

論曰此云何觀謂以慈修心於諸衆生愛猶已子過去世時無量苦惱現生之中病苦大海未來長時輪迴險難如十地經說無智愚癡異生之類有無數身已滅現滅當滅如是滅已不能於身而生厭患轉更增長衆苦機關隨生死流不能出離不能棄捨諸蘊執藏不能遠離大種毒蛇不能觀察六處空聚不能斷除我及我所不能拔出見慢毒箭不能息滅貪恚癡火不能破壞無明黑暗不能枯涸渴愛巨浪不求十方大聖導師入邪稠林隨逐魔黨於輪迴海一向漂沒無明卵殼厚膜纏裹老病死苦常所逼切我今爲愍諸有情等而作救護積集無量福智資糧以是善根皆悉令得究竟清淨彼經復說是諸有情馳騁

生死險難惡道地獄旁生琰魔羅界愚癡暗蔽闕大導師乃至沒於愛河洄渢流轉不暇省滅欲恚害尋無由棄捨貪欲習氣身見羅刹之所執持我慢洲渚無所依怙不能超越六處聚落無少善根而能濟渡是故我今以大悲力拔彼衆生令脫苦難離垢寂靜當令安住一切智智大寶洲故是諸有情憂悲苦惱隨轉連縛貪愛桎梏之所檢繫無明諂誑長時覆翳於三界獄不求出離我皆令脫種種怖畏現前苦惱使無障礙得安隱樂

論曰如是於他堅固深心則能增長大悲福行又最上問經云晝夜六時著新淨衣禮敬諸佛常生尊重次第修作成普賢行又三聚經說頭面接足禮敬諸佛則能懺除一切罪垢三聚者謂懺悔勸請隨喜福等又優波離所問經中但明勸請一種義利解諸魔網悟無常故又等行禮敬一切諸佛如無盡意經說自他懺悔所獲福行如普賢行四伽陀中說隨喜福行如月燈經隨喜品說自餘經中具明三種次明廣大供養回向行相如寶雲經云若諸菩薩以所生花及諸焚香梅檀香樹劫樹寶樹乃至無主宰者無執持者晝夜六時運心供養佛菩薩等又三三昧耶經

云十方世界國土所有地生寶山水生寶山一切妙藥諸清淨水上妙飲食及諸金寶乃至北俱盧洲林藤地味自然香稻最上愛樂所受用者長時運心如前供養

論曰如上所明廣大親近承事供養佛菩薩等如是聞已畢竟一心依教而行發願回向如普賢行經見金剛幢經或十地經中說復次菩薩摩訶薩住極喜地引發十種廣大誓願所謂承事供養一切如來而能成就清淨勝解如是行相盡虛空界同等法性窮未來際一切劫數所有諸佛出興於世作大供養無有休息是爲發起第一大願

爲欲受持一切如來所說法眼善能守護諸佛正教盡虛空界同等法性窮未來際一切劫數攝受正法無有休息是爲發起第二大願

爲於諸佛出現於世最初安住兜率天宮降神托陰住胎誕生長年出家修行苦行坐苦提場降伏諸魔轉正法輪示涅槃相最先加行往請供養於一切處同時而轉最上法輪盡虛空界同等法性窮未來際一切劫數所有諸佛出現世間請轉法輪無有休息是爲發起第三大願

爲欲引發廣大無量諸菩薩行及無分別諸波羅蜜  
圓滿清淨所攝諸地總相別相同相異相成相壞相  
如實無倒顯示教誠諸菩薩行使令發心盡虛空界  
同等法性窮未來際一切劫數所行正行無有休息  
是爲發起第四大願

爲欲成熟諸有情界有色無色有想無想非有想非  
無想卵生胎生濕生化生三界六趣之所繫屬名色  
所攝使令永斷一切趣數皆悉入於諸佛法中畢竟  
安住一切智智使無遺餘盡虛空界同等法性窮未  
來際一切劫數成熟有情無有休息是爲發起第五  
大願

爲欲入解十方世界若廣若狹若麤若細或覆或仰  
雜亂而住猶如帝網分位各異以相應智現前了知  
盡虛空界同等法性窮未來際一切劫數悉能入解  
如是世界無有休息是爲發起第六大願

爲欲嚴淨諸佛國土從一佛刹至一佛刹皆以光明  
周遍瑩飾離諸煩惱成清淨土大智有情充滿其中  
普入諸佛廣大境界隨諸有情意樂歸向平等顯示  
皆令歡喜盡虛空界同等法性窮未來際一切劫數  
及佛刹數普令嚴淨無有休息是爲發起第七大願

爲欲與諸大菩薩衆同一意樂積集善根同一所緣住平等性常得值遇諸佛菩薩隨其所欲不相捨離示佛威力等同發心而復獲得不退神通卽能往詣一切世界於大衆中現同類身樂修菩薩所行正行悟不思議大乘妙法盡虛空界同等法性窮未來際一切劫數等諸菩薩悟入大乘無有休息是爲發起

第八大願

爲欲乘御不退轉輪諸菩薩行身語意業皆不唐捐若暫見所作於佛法中便得決定暫聞言音卽生淨信能起正智永斷煩惱願令是身如大藥樹拔諸疾苦如如意寶濟諸貧乏廣利衆生修菩薩行盡虛空界同等法性窮未來際一切劫數不虛所行無有休息是爲發起第九大願

爲於十方一切世界當證無上正等菩提於其所化毛道衆生或一或多皆能顯示降生出家成等正覺轉大法輪入般涅槃示佛境界智慧威力隨諸有情之所意樂於剎那頃普令覺悟盡衆生界真實回向唯一菩提廣大涅槃咸以一音宣說法要令諸有情心皆悅豫以神通力悉能充滿一切世界示大智力則能建立一切諸法示大涅槃而不泯絕一切諸行

盡虛空界同等法性窮未來際一切劫數成三菩提無有休息是爲菩薩引發十種廣大誓願論曰如是觀想深心精進於一切處作是回向如觀音解脫經云以我所作一切善根平等回向令諸衆生離墮落怖令諸衆生脫諸眷屬恩愛怖令諸衆生滅愚癡怖令諸衆生斷繫縛怖令諸衆生離斷命怖令諸衆生離貧窮怖令諸衆生離天壽怖令諸衆生離毀謗怖令諸衆生離輪迴怖令諸衆生離大衆威德怖令諸衆生離諸死怖令諸衆生離惡趣怖令諸衆生離黑闇怖令諸衆生離冤憎會怖令諸衆生離普賢行經中偈云

清淨勇猛文殊尊

普賢勝德亦如是

彼二大士說回向

我當隨順而修學

十方三世諸如來

所說回向清淨教

我今積集諸善根

悉同最上普賢行

恭敬作禮品第十七之一

論曰此明次第禮敬諸佛增長福行當云何知如觀察世間經偈云

若一刹那頃 承事於諸佛 我說所得報  
示離八無暇 形色極殊好 成就相莊嚴  
安住佛法中 無復諸懈怠 是人於現生  
受用皆充足 常爲衆所尊 無病身光潔  
後生長者家 尊崇無與等 廣興於惠施  
珍寶無憚怯 復作轉輪王 統御四天下  
人民咸善順 國土皆豐樂 威德力具足  
七寶皆殊絕 於一切時中 而勤修供養  
得生忉利宮 自在彌盧頂 爲帝釋天主  
奉持清淨教 若人於佛塔 合掌而右旋  
於俱胝劫中 受福無窮盡 又復於佛塔  
發心而致禮 於無量劫中 離生盲跛躉  
堅固諸善根 具勇猛精進 速得成菩提  
斯由禮佛塔 若於惡世中 向佛暫歸命  
則爲已親近 百千俱胝佛 是人於世間  
最勝無過上 自在人中仙 端正無倫匹  
若人以華鬘 乘上妙輦輿 珍寶而嚴飾  
生三十三天 奉施於佛塔 從此人中沒  
宮殿樓閣中 天女常圍繞 有清淨池沼  
八德水盈溢 底布以金砂 琉璃玻瓈岸

受上妙快樂 慧命皆長久 從此天中沒  
得生豪貴家 於百千億劫 受勝福無極  
常以妙華鬘 處處而供養 爲轉輪聖王  
及帝釋天主 大自在天子 世主大梵王  
由作是施故 穫如上功德 以上妙細氈  
施佛大導師 是人於世間 義利皆成就  
又復以衣鬘 持以施佛塔 遠離下種族  
永不生於彼 脊屬常圍繞 無別離苦惱  
常得大國王 供養而稱讚 或生天龍中  
及世間智者 具勇猛威神 福報無與等

若國城種族 於世尊塔廟 是人以少香  
其微如芥子 以決定信心 而興於供養  
所獲之功德 今嘗聽我說 永離諸垢穢  
堅固清淨心 除病惱憂悲 容儀極高爽  
得作轉輪王 具大智威德 隨其所至處  
福力皆成就 若王若人民 咸樂常尊奉  
以上妙衣服 奉施於佛塔 是人於當生  
身肢極光潔 哥屍迦天衣 俱時而顯現  
常出適意香 聞者生歡悅 又復以金縷  
織成殊勝衣 巧妙善安布 師子衆形相

後生於天中 所願無不果 珍寶衆縷絡  
隨念於掌生 若人以妙幡 懸施於佛塔  
隨彼所意樂 往生諸佛國 當獲金色身  
衆相悉具足 上饌衆甘味 咸樂持奉獻  
又復以繒氈 莩毳諸珍服 兜羅哥屍迦  
作幢而施佛 是人於當生 庫藏皆充溢  
離眷屬惱害 堅固無量智 上下悉莊嚴  
衆樂常瞻奉 不爲火所燒 及刀杖加害  
若持一燈明 供養於佛塔 由作是施故  
獲壽命長久 清淨心明了 形色皆圓滿  
是人於後身 生金河淨刹 妙臂出光明  
有大堅固力 遊行於世間 而無諸恐怖  
假使那由他 若干諸佛刹 芥子滿其中  
稱量可知數 我說是福報 窮劫不能盡  
以廣大縷益 持以施佛塔 是人不久得  
具三十二相 常出妙光明 無比難思議  
其光常晃耀 莹徹若金河 猶俱蘇摩花  
開敷相間飾 名稱普周徧 具殊特神通  
受用無有邊 得最上安隱 常得諸天人  
親近而承事 少欲具威儀 堅持於淨戒

住寂靜林中 樂修諸禪定 智慧無所減  
不捨菩提心 知足無希求 等行於慈行  
若人作音樂 供養人中尊 離煩惱憂戚  
獲聲相圓滿 眼目極明顯 諦視無雜亂  
耳常聞妙聲 清淨心如悅 鼻高脩且直  
嚴相皆具足 其舌常嫩滑 紅潤若珊瑚  
音響如天人 聞一俱胝量 離無舌醜報  
永不生蛇中 最上殊勝身 端直無破曲  
常生善淨意 暫無少間斷 諸天人龍神  
摩睺羅迦等 隨所行世間 安慰而守護

大乘集菩薩學論卷第二十一

由作是施故 獲如上福報

大乘集菩薩學論卷第二十二

轉十

法

稱

菩

薩

造

恭敬作禮品第十七之二

若人於我滅度後而能修治佛塔廟  
百千那由他劫中巍巍身相皆嚴好  
最上適意栴檀香合成宮殿及輦輿  
雖獲勝報無所著斯由修治於佛塔  
於佛正教欲滅時不生闇浮諸國土  
隨其意樂住天宮斯由修治於佛塔

宋西天三藏朝散大夫試鴻臚少卿宣梵大師曰稱等奉詔譯

厭患五欲諸垢染

安住清涼淨戒蘊

廣修梵行靡不周

斯由塗香於佛塔

從是滅已生天上

快樂豐饒不可量

復能教化諸天人

斯由塗香於佛塔

面貌圓滿常熙怡

所發言音生衆善

見者咸興敬愛心

斯由塗香於佛塔

遠離無邊惡道苦

常得親近諸如來

廣修淨業利羣生

斯由塗香於佛塔

若人暫於剎那項

能於佛塔拂塵網

是人之報難可量

示離八難生無難

勇猛聰慧悉明了

於五欲境無追求

常能出離諸輪迴

斯由淨心埽佛塔

具足禁戒無缺犯

聞深妙法生忻仰

永不退轉菩提心

斯由淨心埽佛塔

是人能於惡世中

常離毀訾諸過失

積集廣大勝福慧

斯由淨心埽佛塔

獲得上味諸珍饌

殊淨衣服所莊嚴

常覺妙觸適諸根

斯由淨心埽佛塔

若於佛塔生歡喜

而能除去諸萎華

由依十力大導師

得離五欲深怨害

形儀挺特世希有  
王者常生愛敬心  
具足菩薩諸戒品  
意常明了遠癡迷  
棄背煩惱諸障染  
於一切處獲輕安  
得受人中第一施  
清淨福慧莊嚴身  
又復持以新妙花  
而於佛塔換萎者  
若人能於諸佛塔  
彼於佛德善稱揚  
諸天龍神摩暎羅  
譬如妙花開世間  
由彼善說正法故  
令衆生離惡趣中  
福力念慧皆具足  
我說是人於世間  
常發柔和寂靜音  
於其富樂不生貪  
衆所樂觀無厭捨  
由去萎花於佛塔  
滅除一切險惡道  
由去萎花於佛塔  
永無病苦相纏縛  
由去萎花於佛塔  
復以最上諸供養  
由去萎花於佛塔  
或曼陀羅鉢吒羅  
斯人當獲殊勝報  
精勤合掌伸禮敬  
令其見者皆稽首  
王及臣民生信重  
而能善說諸法要  
安住佛智無缺減  
增長人天勝義利  
眷屬廣多常善順  
隨其意樂心安隱  
教諭羣生使出離  
斯由合掌禮佛塔

能行布施及愛語

利行平等亦復然

爲他毀訾不生瞋

斯由合掌禮佛塔

或往天中爲帝釋

或在世間作人王

所至自在悉隨心

斯由合掌禮佛塔

於諸欲境無耽染

處世豪貴常止足

永不墮於惡趣中

斯由合掌禮佛塔

所發言辭豐義味

悉與經典善相應

常生人世上族中

斯由合掌禮佛塔

若以最上清淨心

盈掬持花散佛上

所獲之報得爲王

安住如前興善利

彼於五欲能覺了

則無憂惱所逼迫

身相端嚴衆樂觀

自性寂靜忘諸怖

又如大悲經云阿難若有衆生能於現在供養我者

若我滅後供養舍利芥子許者復能爲我造立形像及塔廟者阿難且置是事設使有人暫能發起一淨信心緣念諸佛持以一華散於空中而用供養是人當得轉輪聖王帝釋天主大梵天王卽能超越前際無知及未來劫生死流轉阿難復置是事假使有人而於夢中能以一花散空供養我說是人以此善相所得福報不知其邊又娑伽羅龍王所問經云若菩

薩親近諸佛則能獲得八種增上之法何等爲八一  
者教化衆生覩佛妙相二者於如來所承事供養三  
者於衆會中讚佛勝德四者想念如來造立形像五  
者勸化衆生常不離佛六者隨所至處常聞佛名七  
者常願往生諸佛國土八者志不怯弱樂求佛智是  
爲八種增上之法論曰復何增長殊勝義利謂於佛所起承事故當得  
菩提如華嚴經偈云

無量億千劫 佛名難可聞 沉復得親近  
示斷諸疑惑 如來世間明 通達一切法

普生三世福 令衆悉清淨 如來出世間  
爲世大福田 普導諸含識 令其集福行  
若有供養佛 永除惡道畏 消滅一切苦  
成就智慧身 若見兩足尊 能發廣大心  
是人常值佛 增長智慧力

是經復說

如來大慈悲 出現於世間 普爲諸羣生  
轉無上法輪 如來無數劫 勤苦爲衆生  
云何諸世間 能報大師恩 寧於無量劫  
受諸惡道苦 終不捨如來 而求於出離

寧在諸惡趣 常得聞佛名 不願生善道  
暫時不聞佛 何故願久住 一切惡道中  
以得見如來 增長智慧力 若得見於佛  
減除一切苦 能入諸如來 大智之境界  
若得見於佛 捨離一切障 長養無盡福  
成就菩提道

論曰暫見形像尚獲斯報況復親覩如來色相信受  
教誨得福甚多如信力入印經云文殊師利若有善  
男子善女人能於一切世界微塵數辟支佛所日日  
持以百味飲食上妙衣服於河沙劫而用供養文殊  
師利若復有人暫能瞻奉一畫佛像及諸經典此福  
勝前無量阿僧祇何況合掌持以一花或以一香及  
以塗香或然一燈而以供養此福勝前無量阿僧祇  
論曰此明方便增長功德如菩薩藏經云若能修治  
故舊佛塔當獲四種清淨大願一者最上色相無有  
與二者受持經典精進無懈三者所生之處得見  
如來四者於當生身具足諸相是經復說若人能於  
如來塔所以衆名花及諸塗香恭敬供養而復獲得  
八種無減一者色相無減二者受用無減三者眷屬  
無減四者戒品無減五者定力無減六者多聞無減

七者智慧無減入者勝願無減又如寶積經云假使衆生充滿三有各各造作如來塔廟其量高廣如須彌盧山於毘伽沙劫各以種種上妙供養若菩薩以不捨一切智心持以一花奉施彼塔所獲福蘊復過於彼是經復說假使三千大千世界所有衆生一一皆得轉輪聖王安住大乘一一輪王以大海量而爲燈器等彌盧山而爲燈炷各以如是供養佛塔若出家菩薩能以少油塗燃爲燭持用供養如來塔廟所得功德勝前燈施百分歌羅分乃至烏波尼刹曇分不及其一又彼轉輪聖王能於現前佛比丘衆以諸

樂具而用布施若出家菩薩常行乞食或有所得隨彼見者分以食之所獲功德勝前無比又彼轉輪聖王以袈裟服積如須彌能於現前佛比丘衆持用布施若出家菩薩於三衣外所有長物隨應奉施現前諸佛安住大乘諸比丘僧及如來塔其所得福倍前所施又彼轉輪聖王一一各以滿闍浮提諸上妙花供養佛塔若出家菩薩能以一花施如來塔勝前供養百分歌羅分乃至烏波尼刹曇分不及其一論曰若廣明行相如次第超越品說彼出家菩薩如是知已若能現前供養如來卽獲四種賢善功德一

者常得最上恭敬供養二者彼所見已隨順依學三者而能堅固大菩提心四者增長善根現前得見三十二種大丈夫相又海意菩薩所問經云復次海意有三種法名爲供養承事如來何等爲三一者發菩提心無有退轉二者於諸正法而能攝持三者於衆生所發起大悲又寶雲經說善男子菩薩成就十法處於胎藏垢穢不染何等爲十一者以淨信心造如來像二者修治諸佛故舊塔廟三者以衆妙香而用塗飾四者持諸香水灌沐如來五者於佛塔中埽灑塗地六者親能承事所生父母七者親能供養和尚

闍梨八者常能供給同梵行者九者所行惠施不希其報十者以此善根令諸有情不染胎藏垢穢而生善男子若能具足如是十法則能發起深心隨喜如般若經云若菩薩摩訶薩安住大乘應當最初發心隨喜是諸菩薩能行是行則於大乘得不退轉佛言憍尸迦假使有人而能稱量三千大千世界可知其數此諸菩薩發心隨喜所得功德不可校計時帝釋天主白佛言世尊若諸菩薩從初發心乃至得成正等正覺而於其中所作無量隨喜善根若諸菩薩不聞不知亦不攝取當知是人爲魔所持佛言憍尸迦

若善男子善女人欲速證得如來應供正等正覺應於大乘發心隨喜然於聲聞辟支佛乘亦非愛樂亦非捨離而能共彼興隨喜心當知是人在所生處常值十善則能獲得供養恭敬尊重讚歎於所見色聲香味觸無不可意永離惡趣得生天上所以者何是人所作如其利益使諸衆生皆得快樂以是善根能令無量阿僧祇人發隨喜心當得阿耨多羅三藐三菩提是經復說須菩提假使殞伽沙數三千大千世界一切衆生皆發阿耨多羅三藐三菩提心一一各於殞伽沙劫修四禪定安住寂靜離動亂想若菩薩

摩訶薩修習般若波羅密多能以方便善巧攝取過去未來現在諸佛所修定慧解脫解脫知見於緣覺乘及聲聞乘所有戒定慧解脫解脫知見如是等種種善根合集稱量以最上最極最勝最妙廣大無量無等等心皆悉隨喜復以如是隨喜善根回向阿耨多羅三藐三菩提須菩提其所得福勝前菩薩修定功德不可爲比百分歌羅分乃至烏波尼刹曇分不及其一

論曰此說回向行竟勸請功德如最上問經云若能攝受正法則爲已於無量無數諸佛刹土護佛受命

## 念三寶品第十八之一

論曰明賢善行次第增福此非別因而能獲得謂於信等常當修習如祕密大乘經云佛言大王汝今當知有四種法若能於此如理行者則爲安住大乘趣向勝道所有善法而無壞失何等爲四大王一者謂信能向勝道復何名信以有信故而能隨順諸聖種類所不應作而悉不作二者尊重能向勝道以尊重故於諸聖者所說妙法審諦聽受三者無慢能向勝道以無慢故則能於彼一切聖衆恭信頂禮四者精進能向勝道以精進故若身若心悉得輕安所作善

摩訶薩修習般若波羅蜜多能以方便善巧攝取過去未來現在諸佛所修定慧解脫解脫知見於緣覺乘及聲聞乘所有戒定慧解脫解脫知見如是等種種善根合集稱量以最上最極最勝最妙廣大無量無等等心皆悉隨喜復以如是隨喜善根回向阿耨多羅三藐三菩提須菩提其所得福勝前菩薩修定功德不可爲比百分歌羅分乃至烏波尼刹利曇分不及其一

論曰此說回向行竟勸請功德如最上問經云若能攝受正法則爲已於無量無數諸佛刹土護佛受命

### 念三寶品第十八之一

論曰明賢善行次第增福此非別因而能獲得謂於信等常當修習如祕密大乘經云佛言大王汝今當知有四種法若能於此如理行者則爲安住大乘趣向勝道所有善法而無壞失何等爲四大王一者謂信能向勝道復何名信以有信故而能隨順諸聖種類所不應作而悉不作二者尊重能向勝道以尊重故於諸聖者所說妙法審諦聽受三者無慢能向勝道以無慢故則能於彼一切聖衆恭信頂禮四者精進能向勝道以精進故若身若心悉得輕安所作善

### 法皆得成辦

論曰此說於信常所修習如是別明信等五根如無盡意經說云何五根所謂信根進根念根定根慧根云何信根謂於四法深忍樂欲一者於生死中行正正行信於業報由造業故彼報定有乃至失命終不作罪二者信樂菩薩所行正行不求餘乘不隨諸見三者於勝義中了知無我衆生壽者補特伽羅於空無相無願諸法深能信解四者於佛功德力無畏等生決定信斷除疑網是名信根云何進根若法信根所攝是法勤勇無間是名進根云何念根若法進根

所修是法終不忘失是名念根云何定根若法念根所攝是法一心不亂是名定根云何慧根若法定根所攝是法自所觀照不從他解是名慧根是五根者相續而起則能圓滿一切佛法

論曰復於信力等法常當修習如寶髻經云善男子云何菩薩力行清淨謂於諸根無有怯懦一切惡魔不能動亂聲聞緣覺不能退轉一切煩惱不能破壞而能堅固安住大乘夙願滿足心淨勇猛密護身根得勝清淨

論曰如是信等根力常能修習所修慈行增長功德

如月燈經偈云

那由他億佛刹中 所有種種供佛具  
悉以供養諸如來 不及慈心一少分

大乘集菩薩學論卷第二十二

音釋

姦宄

姦古閑切宄居消  
切姦宄詣僞也

洞

洞戶恢切渡房六  
切洞渡水漩流也

桎

桎桂之貴切足械也  
切手械也

誕

徒旦切  
柔弱切

嫋

奴困切  
於爲切

萎

枯也

十一

北轉

傳十

**音釋** 聲之貴也。凡聲皆有音，音者聲之發也。故曰音。釋者，解也。釋者，解其音之體也。故曰釋。

大乘惠普藏學館卷第十二

不以慈心一念

吸日登臺，智力常能修習。所修造行增長功德，  
則此中也。意滿胸中，則日重重共樂具。

十一世二